



EVERY HERO NEEDS A
MAMA FLAME



Palamen tasol inap rausim SABL

GAVMAN i mas kisim bek ol graun we Spesel Egrikalsa Bising Lis (SABL) bin kisim pinis bikos dispela lis i no gutpela long ol pipel bilong Papua Niugini.

SABL em wanpela nupela lo bilong baim graun na givim go long wok forest na egrikalsa insait long kantri we sampela provins i bin stap insait pinis long dispela agrimen. Sampela papagraun i bin salim graun bilong ol pinis aninit long SABL olsem long Oro provins we Gavana Gary Juffa save toktok planti taim long palamen long rausim.

Long dispela wik, Oposisen lida Don Polye i tok Oposisen bai sanap strong na askim palamen long kisim bek ol dispela graun we ol papagraun bin lusim pinis long SABL agrimen.

Mista Polye i tok mak olsem 11 pesen (%) bilong ol graun em ol papagraun i lusim go pinis long han bilong SABL we ol ovasis na ausait bisnis lain i bin kisim long mekim ol wok

egrikalsa plantesen na fores loging long en.

Mista Polye i tok dispela em i olsem nupela yia risolusen bilong Oposisen long mekim kamap long kisim bek graun bilong ol pipel.

I gat pinis Komisn Ov Enkwari ripot insait long wok bilong SABL na dispela ripot i stap pinis long palamen long ol memba long toktok long en. Ekwari ripot i tokaut pinis long planti samting we i no gutpela long dispela SABL agrimen.

Dispela ripot i soim olsem SABL em i wanpela lis we gavman bai kisim graun bilong papagraun inap 99 krismas olgeta long mekim bisnis. Taim papagraun i sainim dispela agrimen na kisim mani, graun bai go olgeta long han bilong gavman inap 99 krismas. Bihain long 99 krismas i pinis, graun bai stap yet aninit long Stet o gavman we pipel i lusim graun bilong olgeta.

I go moa long pes 2...



Gordons maket long Pot Mosbi i senisim kala bilong em gen long kaikai. Planti ol kaikai i kamap gut gen bihain long tupela wik nau ren i pudaun long Mosbi na Sentral Provins. Poto i soim David i salim ol kala kukamba na poto bilong em long Gordons maket. Poto Nicky Bernard.

Gordons maket i kala gen...

Friends love to share

One SIM for you & one SIM for your bestie, only on the friendlier network.

76003555 or 1555
connect@bmobile.com.pg

Connect with us on

www.bmobile.com.pg



Supporting PNG MADE

Bestie two SIM pack
K5 only

bmobile | vodafone

O'Neill: Ol Hela lida mas wokbung

PRAIM Minista Peter O'Neill i askim ol lida bilong Hela Provins long wok bung wantaim na putim laik na ting ting bilong ol pipel i go pas.

Mista O'Neill i tok ol lida bilong Hela Provins i mas putim ol intres bilong pipel i go pas na wok bung wantaim long gutpela we long kirapim provins.

Mista O'Neill i mekim dispela toktok bihain long Hela Gavana Anderson Agiru na Memba bilong Komo-Margarima, Francis Potape, i pait long Nesanel Kot long painimaut husat tru i gavana bilong provins.

Mista Potape i kisim sapot bilong ol kaunsil presiden bilong Hela na i kamapim wanpela vot i

no gat bilip long rausim Gavana Agiru.

Dispela vot i no gat bilip i kamap long Tari bipo long las wik bihain long olgeta provinsal eksekutiv kaunsil (PEC) memba i sapotim Mista Potape.

Deputi Gavana Thomas Potape, husat i kaunsil presiden bilong Komo LLG, i bin kamap siaman bilong dispela miting we moa long 13 memba bilong PEC i bin wanbel long makim Potape i kamap nupela gavana bilong Hela Provins.

Mista Agiru i tok no gat wanpela man inap long rausim em bikos sia bilong em olsem gavana i stap yet. Dispela hevi nau i stap long han bilong Nesanel Kot long Waigani.

Mista O'Neill i askim ol lida bi-



Hela Gavana Anderson Agiru.

long Hela i mas wokbung long kirapim ikonimi bilong provins bi-

long ol na ol i no ken kamapim hevi bilong sait bilong politiks bikos Hela em i bikpela ikonimik gaden bilong PNG.

"Nesanel gavman i no gat pawa long i kam insait na stretim dispela hevi tasol mipela i wari long ol pipel long Hela.

"Mi laik askim ol pablik sevan long no ken lusim wok. Ol pablik seva i mas mekim wok long sevim ol pipel, ol i no ken sapotim ol memba na lusim wok," Mista O'Neill i tok.

Em i tok dispela hevi i no ken larim ol pablik sevan i les long wok.

Oposisen Lida Don Polye i sutim tok i go long Praim Minista O'Neill olsem em i wok long yusim Mista Potape long rausim Gavana Agiru.

"Samting i kamap ples klia. Ol manmeri bilong Hela i no ken pasim ai na slip. Praim Minista i laik yusim 4.27 Kroton Ekwiti bilong ol papagraun long kisim wanpela Sovren bon dinau mani na em i yusim Potape long rausim Agiru bikos Agiru i les long O'Neill yusim ol mani bilong PNG LNG papagraun," Mista Polye i tok.

Mista Polye i tok sia bilong gavana bilong Hela i no bin stap nating na dispela pasin ol memba bilong Hela PEC na Memba Potape i mekim em i no stretpela pasin.

"Hela no ken long long na larim Praim Minista i yusim yupela. O'Neill i laik stilim LNG mani na yusim Potape long rausim Agiru," Mista Polye i tok.

Odita Jeneral mas sekim LNG mani

OPOSISEN Lida Don Polye i tok Opis bilong Odita Jeneral i no mekim stretpela wok tasol i wok long larim politiks i bagarapim wok.

Mista Polye i singautim Opis bilong Odita Jeneral long 'kirap na mekim stretpela wok'.

"Mi laikim Odita Jeneral long mekim ol wok painimaut i go insait long ol mani bilong PNG LNG Projek," Mista Polye i tok.

Mista Polye i tok Opis bilong Odita Jeneral i gat planti wok long mekim na wanpela wok em long sekim gavman long olsem wanem ol i wok long yusim mani i kam long PNG LNG Projek.

Em i tok mani bilong PNG LNG kantri inap long kisim bihain ExxonMobil i salim

pinis moa long 150 LNG kago i no kam insiat long kantri.

"Opis bilong Odita Jeneral i mas sekim dispela," Polye i tok.

Mista Polye i tok em i no ting ol mani bilong LNG i no kam insait yet long kantri na i no stap long kantri.

"Mani bilong ol papagraun na pipel bilong PNG i no stap long Sentral Benk," Mista Polye i tok.

Sentral Benk Gavana Loi Bakani i tok Sentral Benk i gat tras akaun we i holim ol royalti mani bilong ol papagraun long ol wan wan projek eria.

Mista Polye i tok dispela mani i stap long tras akaun long Sentral Benk em i mani we em (Polye) i bin stap Tresera na putim long givim long

ol papagraun olsem Infrastraksa Developmen Gren (IDG) na MoA fan mani.

"Em ol mani bilong IDG na MOA fan tasol. Em i no mani gavman i kisim long LNG."

"Mi bin kamapim dispela tras akaun taim mi bin stap Tresera," Mista Polye i tok.

Em i tok LNG mani PNG inap long kisim aninit long 16.57 pesen ekwiti gavman holim long projek, i nau wok long go insait long wanpela eskro (escrow) benk akaun bilong invesmen benk Yunion Benk ov Swiselan (UBS) long Singapo.

Mista Polye i tok Kumul Petroleum Holdings Limited (pastaim NPCP) i makim maus bilong PNG gavman na sainim wanpela agri-

men ol i kolim 'peimen daireksen did' long larim ol LNG mani bilong PNG i go insait long eskro benk akaun bilong UBS.

Em i tok ExxonMobil PNG i wok long salim LNG mani i go insait long wanpela kampani ol i kolim GLOCO.

Mista Polye i tok ExxonMobil i bin kamapim GLOCO na em i ran olsem wanpela spesol pepes kampani long Singapo.

"GLOCO i wok long salim LNG mani i go insait long UBS eskro akaun long bekim K3 bilien dinau mani PNG Gavman i bin," Mista Polye i tok.

Ol arapela projek patna olsem Oil Search, Santos, MRDC na JX Nippon i kisim pinis winmani ol i mekim taim Saina, Japan na Taiwan i baim PNG LNG.

I no gat sevis deliveri long Tewai Siassi Iektoret

Stori kam long Opis bilong DIRD

DISTRİK Sevis Impruvmen Program (DSIP) bilong Tewai Siassa long Morobe provins i bin kisim K20 milien long karim aut ol sevis na developmen long dispela lektoret long las yia tasol nau yet i no gat wanpela sevis i kamap.

Gavman i putim mani bilong kamapim developmen bilong ol infrastraksa bilong helt edukesen na ol ikonimik sekta tasol Tewai Siassi i no gat ol sain bilong dispela kain samting i kamap.

Wanpela tim bilong ol gavman opisa bilong Dipatmen bilong Nesanel Plening na Monitaring, Fainens na Opis bilong Rurel Developmen i bin go wokim wanpela sevis raun long luksave long ol wok kamap long Tewai Siassi distrik. Ol opisa i bin lukim olsem ol kain sevis olsem ol skul, et pos, helt senta, plantesin, distrik edministresen na ol narapela

samting i bagarap pinis.

Tasol dispela tim bilong ol opisa i no raunim olgeta hap bilong ilektoret bikos Memba bilong Tewai Siassi na Minista bilong Fiseris na Marin Risos, Mao Zeming i bin askim ol long noken lukluk ruan long ilektoret bilong em.

Tasol liklik hap ol opisa i bin lukim em ol i lukim olgeta LLG kaunsel samba haus i bagarap olgeta na ol rot long Finschaffen i go long Sialum gavman stesin i bagarap olgeta.

Ol tim i lukim wanpela polis opisa tasol i stap long polis stesin, tasol i no gat kar long mekim wok bilong stretim lo na oda we i save kamap long ol man i dring hombrun na ol narapela drag samting.

Pawa i save kam long jenereta tasol long dispela taim nau jenereta i bagarap pinis tupela yia olgeta em i no moa bringim pawa i kam.

Ol pipel i stap arere long stesin i tok ol pablik sevan i save stap longwe long

stesin olsem long Fishchaffen o Lae siti na mekim wok.

I no gat tru wanpela samting long lukim long graun. I luk olsem ol pipel long stesin i save stap wantaim pret. I no gat wara saplai i go long stesin. I luk olsem wara saplai i bin stop bikos edministresen i no bin baim wara bil na tu i nogat mani bilong wokim mentenens.

Ol mama i save wokabout i go antap long maunten olsem sikspela o sevepela kolomita olgeta de wantaim bilum kontena long kisim wara bilong lukautim ol famili bilong ol long kaikai na long skul na wok.

Ol pipel long ples arere long Sialum stesin i tok, "Sialum i luk olsem taun bilong ol tewel bikos long El Nino, ples i drai olgeta na dispela distrik i stap long mak bilong pundaun olgeta. Ol pipel i pilim hat long nambis na maunten wantaim. Ol pablik sevan long Sialum Stesin i no moa stap long harim hevi bilong mipela.

Palamen tasol inap rausim SABL

I kam long pes 1...

Narapela ripot tu i tokaut olsem taim Minista bilong Lens i sainim dispela agrimen wantaim papagraun, em yet i no gat pawa moa long rausim dispela agrimen o len taitel. Em samting bilong palamen tasol long rausim. Wankain tu, kot i no inap long rausim dispela len taitel bilong SABL. Palamen tasol inap rausim.

Ripot i lukim tu olsem bai planti giaman na paul pasin i kamap we ol bisnis lain na mani

lain i ken grisim ol papagraun isi tru na kisim nating graun bilong ol aninit long SABL agrimen. Taim papagraun i sainim agrimen (consent) ol givim graun bilong ol go olgeta we ol yet i no klia gut long gutpela na nogut bilong dispela lis agrimen.

Ripot i luksave tu olsem SABL i no mekim klia hamas eria o mak bilong graun ol bai kisim insait long 99 krismas. Dispela em i nogut bikos taim bisnis i ran,

nogat man bai luksave hamas eria bilong graun projek i wok long ran long en.

Mista Polye i tok Oposisen bai sanap strong long dispela samting bikos Praim Minista Peter O'Neill yet bin tokaut long las yia olsem em no amamas long dispela SABL ripot.

Wankain tu, Sif Seketeri bilong Papua Niugini Sir Manasupe Zurenuoc tu i tokaut olsem SABL ripot i soim planti krangki na paul

samting olsem na gavman i mas lukluk gut insait long dispela.

Long nau yet Trensperensi Inenesenel, Papua Niugini (TIPNG) i wok long mekim awenes kempen insait long Papua Niugini long skulim ol manmeri long kisim save gut long ol nogut na bagarap bilong dispela SABL lo.

Ol i raun pinis long ol hap olsem Sandaun, Manus na Sentral provins na ol bai raun yet go long ol arapela hap bilong kantri

long skulim ol manmeri long dispela lo bilong SABL.

SABL em lo na em bai wok wankain olsem ol arapela lis olsem Egrikalsa Lis, Bisnis Lis, Komesel na Propeti Lis tasol SABL i gat moa strong liklik long ol arapela lis ya. Bikos Lens Minista wantaim Lens na Fisikel Plening Bod ken rausim taitel bilong ol dispela Lis. SABL nogat. Palamen tasol gat pawa long rausim taitel na pawa bilong en.

Blek-aut na wara-pas bikpela hevi long Madang

James G. Kila i raitim

LONG Desemba 26, Boksing de wara i bin pas long planti eria bilong Nu Taun, Madang.

Madang taun na ol ples klostu long en i wok long bungim yet planti pawa blek-aut tru stat long mun Desemba bikos bikpela ren na wara tait i bagarapim tripela pawa pos namel long Madang na Ramu haiwe.

Antap long dispela hevi tu em wara saplai long taun i wok long stop planti taim na i givim hat taim tru long ol manmeri long taun.

Planti ol manmeri long Madang taun na ol bisnis haus na ol gavman dipatmen i no amamas tumas long PNG Pawa Limited (PPL) bikos em i no givim toksave pastaim long planti blekaut i wok long kamap.

Ol lain long Madang taun i kros tru bikos bikpela ren i kam na taim blekaut i kamap em i mekim planti

lain i pret nogut ol stilman o trabel man long go brukim haus na stilim ol samting bilong ol.

Wanpela mausman bilong ol Madang taun komyuniti na pastaim deputi taun meiya, Chris Tomongo i tok, PNG Pawa i mas givim toksave long redio o putim notis long niuspepa pastaim long ol i karimaut lod-seding o stopim pawa long sampela hap long taun na larim ol arapela hap i gat pawa.

Em i bin olsem planti lain i no amamas long pasin PNG Pawa i wokim long nogat toksave na ol i stopim pawa.

PPL long Madang i tokaut long wanpela stetmen bilong en olsem tripela pawa pos long Madang-Ramu Haiwe i bruk pundaun bihain long bikpela Aumia na Asas riva i bin tait bihain long bikpela ren.

Long stetmen PPL i tokaut tu olsem long nau yet ol i wok long yusim disel jenereta long 4-mega

Bikpela stua namel long Madang taun i paia tasol nogat wara long stopim hariap. Foto: James G.Kila



wat pawa saplai, na dispela i no inap. Olsem na ol i mas wokim lod-seding.

Wantok Niuspepa i sekim opis bilong PPL long Madang we wanpela wokman i tok sampela ol

teknisen bilong ol i go pinis long dispela eria, tasol bikpela wara i tait tumas na ol i no wokim wok.

Hevi bilong no gat wara i mekim na ol paia man i no bin inap long stopim wanpela bikpela paia we i

kukim tu wanpela olupela Bowen Treding stua long Madang taun. I gat tokwin olsem dispela paia i bin kamap bikos long hevi bilong ilektrisiti long taim pawa i wok long blek-aut na kam bek gen.

Polye: NNB i mas op gen

OPOSISEN Lida Don Polye i singautim gavman long opim gen Nesenel Nakotiks Buro (National Narcotics Bureau) bikos kantri i wok long bungim hevi taim planti yangpela manmeri i wok long smokim mariwana na dring hombru.

Mista Polye i tok em i mekim dispela singaut bikos em les long harim ol yangpela manmeri i dring hombru na stim, na smukim mariwana long Krismas na Nu Yia.

NNB em i wanpela ki gavman ejensi i stap aninit long lo na jastis sekta. Em i save mekim ol awenes toktok long skulim ol manmeri i no ken smokim mariwana na dring stim o hom bru.

Gavman i bin luksave long dispela namba wan wok NNB i save mekim na i bin katim na givim K4.3 milien aninit long 2016 Nesenel Baset tasol nau yet opis i no op gen. "Mi harim olsem NNB opis

i pas. Wanem taim bai gavman i opim gen dispela opis. Planti ol yangpela manmeri i wok long kirapim ol hevi bilong lo na oda taim ol i smokim mariwana na dring hombru,"Mista Polye i tok.

Em i askim ol papamama long lukautim gut ol pikinini na stopim ol long dring hombru na smokim spakbrus.

"PNG i no gat wanpela juvenail rihebilitesen senta long skulim gut ol yangpela pikinini sapos ol i smokim mariwana o dring hombru,"Mista Polye i tok.

Em i mekim dispela toktok bihain long ol polisman i bin holim sampela yangpela sumatin long Lae, Morobe Provins.

Polis i bin sasim ol dispela sumatin bikos ol liklik manmeri tumas long dring bia, na tu ol i bin brukim lo.

Las yia, Sif Seketeri bilong Gavman Sir Manasupe Zuren-uoc i bin tok Nesenel Ekseke-

tiv Kaunsil (NEC) i rausim pinis dairekta jeneral na i tok long makim nupela man long bosim dispela gavman ejensi tasol i no kamap yet.

Sir Manasupe i bin tok em i kisim olgeta pawa bilong dairekta jeneral o bos bilong NNB.

Dispela pawa bai go bek taim NEC i makim nupela bos long lukautim dispela opis.

Ol baset pepa bilong 2016 Nesenel Baset i luksave olsem NNB em i wanpela ki lo na jastis ejensi tasol dispela opis i bin pas long Jun 2014.

Long Tunde, Wantok Niuspepa i go sekim opis bilong NNB long Pot Mosbi tasol opis i pas yet.

No gat wanpela wok manmeri bilong dispela opis i inap tokim mipela sapos ol bai wok o nogat.

Ol i lokim opis na i no gat wanpela wokman i stap long opis. Ol sekyuriti gad tasol i lukautim opis i stap.

Planti wok manmeri bilong NNB i stap nating na ol i stap long gavman peirol na kisim potnait mani nating.

Senia edukesen na awenes opisa bilong NNB, Lawrence Tau, i tok em tasol i wok long mekim ol wok bilong NNB.

"Mi bin stap aninit long wanpela sot tem kontrak na mekim ol awenes wok bilong NNB long tokim ol yangpela manmeri long ol nogut samting bilong drag na hombru.

"Tasol nau mi no stap long gavman peirol na mi save olsem ol arapela poroman bilong mi i stap yet long gavman peirol tasol ol i no save mekim wanpela wok bilong gavman,"Mista Tau i tok.

Mista Tau i tok NNB i bin mekim planti awenes long Sentral provins long yia 2014.

"Mipela i bin mekim planti gutpela awenes long Abau, Mekeo, Hula na Rigo long Sentral Provins," em i tok.

Mt Kare papagraun mas wokbung

MINERAL Risos Atoriti (MRA) i laikim ol papagraun bilong Mt Kare gol na silva maining projek long wokbung wantaim.

MRA i les long lukim ol papagraun bilong Mt Kare i kam raun long opis bilong MRA na askim kainkain samting long sait bilong Mt Kare gol na silva maining projek.

Wanpela wokman bilong MRA i tok gavman i no luksave yet long husat ol man, grup o klen i papagraun tru bilong Mt Kare maining projek.

"Gavman i no luksave yet long ol papagraun tru bilong Mt Kare gol na silva maining projek. Mipela i laikim ol long sindaun gut na stretim ol yet pastaim,"em i tok.

Dispela wokman bilong MRA, husat i les long autim nem bilong en, i tok Nesenel Kot i bin karimaut midiesen long Julai na Ogas 2015 long painimaut ol klen husat i gat graun long ples we EL 1093 i stap.

"Ol papagraun long Hela na Enga sait wantaim i bin bung na dispela midiesen i painimaut 19 klen. Tasol gavman i no luksave yet long wanem klen em i papagraun," dispela MRA wokman i tok.

Mt Kare i no bikpela tasol em i namel sais maining projek na maining opresen inap long kamap long taim yet, tasol planti papagraun i wok long paulim gavman na maining kampani Summit Development Limited (SDL).

SDL em i wanpela liklik maining kampani bilong Australia na EL 1093 i stap wantaim em. Planti ol papagraun long Hela na Enga sait wantaim i tok SDL i bin mekim gutpela wok long kirapim dispela maining.

Need a New laptop, Uniforms or Text books?

BSP PERSONAL LOAN



www.bsp.com.pg f t in

I gat asua long Ijivitari DSIP mani

RIPOt bilong Sif Eksekutiv Opisa (CEO) bilong Ijivitari Distrik i soim olsem i gat bikpela asua long wei distrik edministresen i yusim mani bilong Distrik Sevis Impruvmen Program (DSIP).

Gavman i bin putim dispela mani bilong bringim ol sevis long ol pipel bilong Ijivitari.

Ripot bilong CEO Notalis Naimo i tok olsem, distrik tresera bilong Ijivitari i bin tromoi bikpela mani bilong DSIP long baim haia ka kampani, ol sevis provaida o kontrakta na wanpela hadwe stua, tasol ripot i no gat ol pepa long soim ol dispela ripot.

“O’Neill gavman i bin putim dispela ol mani bilong wokim ol bikpela developmen olsem infrastraksa, helt, edukesen, na iekonomik sekta tasol i no gat wanpela samting i kamap long yumi lukim,” Mista Naimo i tok.

Notalis Naimo i bin tokaut long dispela asua long taim em i bringim ol 2013-2014 DSIP akuita

riplot i go long Dipatmen bilong Implementesen na Ruel Developmen (DIRD) long Pot Mosbi long las wik Fraide.

“I gat bikpela asua i stap long wok bilong DSIP mani bilong distrik treseri. Bilong wanem, distrik tresera i no save toktok wantaim CEO long wanem rot distrik bai yusim mani. Tripela hap bilong ol DSIP mani we i kamaut long distrik treseri em i bin go long baim ol lain i givim sevis tasol CEO i no save long dispela. Olgeta het bilong ol sekta olsem helt, edukesen, lo na jastis, egrikalsa na ol narapela i no save wok wantaim mipela,” Mista Naimo i tok.

Mista Naimo i tok, long dispela as i gat sampela akwital i no gat miting minit bilong Join Distrik Plening na Baset Praioriti Komiti (JDP/BPC) i stap wantaim.

“Bai yu lukim olsem olgeta pepa i no stap wantaim ripot, na tu mipela i mas brukim ol akaun long pinis bilong ol-

geta mun. Mi laikim CFC i mas kam long mi na mi mas save long hamas mani i stap long distrik wok akaun, tasol ol i no save mekim olsem na ol i wok long tromoi mani yet,” em i tok.

Mista Naimo i tok ol i laik bringim sampela kontrakta long Frot Skwat long mekim wok painimaut long ol tu.

Em i tok i gat sampela kontrak we mak bilong ol i winim K500,000 we ol i bin givim kontrak long ol tasol ol i no bin kisim tok orait bilong Provinsal Saplai na Tenda Bot (PSTB).

“Ijivitari distrik i no save kisim tok stia long Oro provinsal edministresen opis stat yet bihain long 2012 nesanel ileksen. Stat long dispela taim, Oro provinsal gavman i bin putim K25 000, na bihain ol i givim mipela K50,000 na i kam inap nau ol i givim mipela K70,000 bilong ranim wok bilong mipela.

“Hevi bilong politik i wok long bagarapim olgeta wok long dis-

trik nau yet. Na i wankain long Sohe distrik tu,” Mista Naimo i tok.

Naimo i tok tu olsem Oro provinsal gavman i no gat kaunta fan o putim mani bilong helpim ol projek na program long Ijivitari ilektoret aninit long Provinsal Sevis Impruvmen Program b(PSIP) bilong Gavana.

Em i tok olsem Nesenel Dipatmen bilong Edukesen i putim K200,000 bilong besik edukesen sevis long distrik, tasol ol i no bin yusim dispela mani bikos distrik treseri i holim i stap.

DIRD Fes Asisten Seketri Aih Vaki i tok long taim bilong kisim DSIP fan ripot bilong Ijivitari distrik olsem ol pablik sevan i mas bihainim ol gaidlain na fainensel instraksen.

Ripot i tok, ol program wok bilong 2013 i bin stap aninit long baset bilong edministresen, edukesen, helt na iekonomik, infrastraksa na lo na oda.

Ganarofu helpim ol skul long Daulo

OL 18 praimeru skul, wanpela sekenderu skul na wanpela nupela haikul bai kisim wan wan 4 in 1 dabol klasrum. Bai ol i ken lukim planti infrastraksa developmen projek memba bilong Daulo long Isten Hailans, Ron Ganarofu wantaim edministresen bilong em bai bringim i go long ol.

Long wanpela seremoni bilong opim wanpela nupela dabol klasrum long Asaru Praimeru skul, Mista Ganarofu i tok klostu long K10 milien, ol fans we i kam yet long Distrik Sevis Impruvmen Program (DSIP) bai i go long sapotim ol projek long Daulo distrik.

Em i tok ol edukesen projek bai go pas long kisim dispela mani. Ol arapela sekta olsem helt, ol rot na bris, iekonomik sekta na lo na jastis tu long distrik bai

kisim helpim tu. Long dispela K3.2 milien bai i go long ol infrastraksa developmen insait long ol praimeru, sekenderu na haikul long distrik. Na K2.4 milien bai i go long ol bilding fan bilong nupela Daulo haikul. K1.6 milien em Mista Ganarofu wantaim distrik edministresen Ipa Seke i givim i go long baim skul subsidi bilong ol sumatin bilong Daulo distrik husat i go long ol teseri institusen na ol arapela haia edukesen institusen, na K370, 000 em i go long apgredim ol fesiliti long Asaroka Lutheran Sekenderu Skul.

Mista Ganarofu i tok edukesen em i bikpela samting long distrik, long wanem, em i bilip long humen risos.

“Long bungim sevis na developmen i go bek long dis-

trik, mipela mas sapotim edukesen we bai ol pikinini i ken kisim gutpela edukesen na dispela ol save ol i kisim, em ol i ken bringim i go bek na bildim distrik i go antap long narapela level,” Ganarofu i tok.

Distrik edministreta Ipa Seke i skruim tok i go mo na tok, distrik aninit long lukaut bilong em i wok long bungim sevis na developmen i go daun long ol pipel long distrik.

“Mi i gat bikpela amamas long tok aut olsem distrik edministresen i kamapim gutpela pasin long wanbel na wok bung wantaim memba Ron Ganarofu, we mipela i tok long kamapim planti gutpela samting i go daun long ol skul pikinini na dispela nupela dabol klasrum we i kost moa long tu handet tausen kina (K200,000).

Wilma driman long kamap jenelis



Het tisa bilong Akameku Praimeru skul, Susan Inamuka i givim elementri setifiket long Wilma Isembo husat i pinisim elementri skul level. *Poto: Sape Metta*

Sape Metta i raitim

TAIM ol pikinini i save go enrol na statim skul long ol elementri skul, planti bilong ol i save tingting na driman long kisim ol bikpela wok olsem tisa, dokta, pailot, akaunten, menesa, jiolojis, saintis, polis, ea hostes, pastobilong sios na planti ol arapela wok.

Planti long ol dispela driman na tingting i save karim kaikai na kamap tru long taim dispela ol pikinini i pinisim skul, greduet na painim wok.

Wanpela yangpela pikinini meri em Wilma Isembo husat i gat 9-pela krismas na i bilong Akameku hauslain long Goroka, Isten Hailans provins. Em i driman long kamap wanpela jenelis (nius ripota) long bihain taim em i pinisim skul.

Wilma i bin tokaut long

dispela driman bilong em long taim em i bin greduet long Akameku Kristen Foniks skul tupela wik i go pinis.

Em i tok em i makim dispela wok jenelis, long wanem em i wanpela wok we i gat planti salens, na tu em bai i gat sans long bungim ol kain kain manmeri na ol pikinini tu.

Tisa in Sas (TIC), Pippo Gutani, i tokim ol sumatin, ol papamama olsem maski sapos dispela skul i kirap na operet long 2013, em i go pas long givim gutpela kwaliti edukesen long ol pikinini long elementri level.

‘Sapos mipela i ken lainim na skulim gut ol pikinini wantaim ol gutpela edukesen program, mipela i luksave olsem dispela ol 13 pikinini husat i greduet nau, olgeta bai i go antap na skul long gret 3 long praimeru skul long yia i kam

bihain,’ Gutani i tok.

Em i tok wankain pasin i bin kamap long las tupela yia. Na em i soim olsem dispela skul we em i go pas long en i wok hat long givim gutpela elementri edukesen sevis i go daun long ol pikinini.

Gutani i tok skul i no save kisim wanpela sapotim long provinsal o nesanel gavman, olsem na em i apil long ol long kam helpim na sapotim Akameku Kristen Foniks skul, na em bai i ken i go het long wok strong long givim gutpela edukesen sevis i go long ol pikinini.

Em i tok amamas long ol papamama na surikim tok tenkyu bilong em i go long Tom Nume husat em wanpela bisnisan na Mi-manalo kaunsil presiden Kessy Maluwe long givim han long sapotim wok bilong skul.



Word Publishing Company Ltd

P. O. Box 1962, Boroko, NCD 111, PNG. Tel: (675) 325 2500 Fax: (675) 325 2579
Email: seovo@wantok.com.pg / word@wantok.com.pg

Subscribe for your WANTOK Niuspepa now!!

All you have to do is fill in the form below and arrange for payment and we will dispatch your copy of the WANTOK to you each week. We publish the WANTOK 52 times a year.

AIRMAIL SUBSCRIPTION RATES (includes postage & handling)
PNG K220.00, Aus:ralia/New Zealand US\$ 10.00, Asia/Pacific US\$150.00
Rest of the World US\$213.00

NCD HOME DELIVERY

K0.80t per copy or K65.00 for two or more copies & Office pickup K52.00 per year for a copy.

Please send me _____ copy/copies of WANTOK for one year.

I enclose Kina/USD _____ as full payment.

Name _____

Postal Address _____

City _____

State/Province (abbreviation) _____

Country _____ Zip/Postal Code _____

Street Address _____

Telephone _____ Fax _____

Email _____

Signed _____ Date _____

Publisher of



Knights: Stretim Manus Ailan

STRETIM Manus Ailan! Gavman bilong Australia na PNG i mas stretim Manus Ailan. Dispela em i singaut bilong Memba bilong Manus, Ronnie Knight.

Mista Knight i lukim olsem planti samting i no stap stret long liklik ailan bilong Manus taim Australia na PNG gavman i wanbel long salim ol asailum sika o ol refuji manmeri i go stap long Manus ri-jonal prosesing senta.

Maski ol dispela asailum sika o refuji lain i laik abrusim dai, hevi o birua long kantri bilong ol yet long Afrika, Midel Is o Saut Asia, ol i no ken stap long Manus.

"Dispela em i laik bilong ol pipel bilong Manus bikos ol dispela asailum sika manmeri i mekim sampela pasin nogut," Mista Knight i tok.

Mista Knight i les long larim ol dispela refuji manmeri i stap long Manus bikos ol i mekim planti samting nogut.

Em i tok save pinis long gavman bilong Australia na gavman bilong PNG tasol tupela gavman i no harim toktok na i no bihainim laik bilong ol manmeri bilong Manus.

Mista Knight i tok sampela ol bikpela asua Australia na PNG Gavman i mas lukluk i go insait na stretim hariap em ol dispela samting.

• Mariwana na hom bru

Mista Knight i tok ol refuji manmeri i stap insait long banis i wok long kam aut long 6-klok moning na i go bek gen long banis long 6-klok apinun. Taim ol i kamaut, ol i wok long kisim ol mit, kakaruk, sosis, smok na arapela kaikai i kam ausait long banis.

Ol i wok long givim ol dispela samting long ol asples man na ol asples man i wok long givim ol mariwana, hombru, bia na pikinini meri tu.

Mista Knight i tok ol dispela asailum sika manmeri i no stap aninit long lo bilong PNG na dispela i larim ol long smok mariwana na dring hombru long laik bilong ol yet.


"Ol asailum sika nau kisim sampela liklik fridom. Ol i wok long kam ausait long banis na i wok long mekim nabaut long laik bilong ol yet.

"Ol i smokim mariwana long laik bilong ol yet. Ol dring stim na hombru bia na brukim lo bilong PNG," Mista Knight i tok.

Manus provinsal polis komanda (PPC) Alex N'Drasal i mekim wankain toktok olsem Mista Knight.

Las yia, Mista N'Drasal bin tok ol dispela asailum sika i wok long kam ausait long banis wantaim sosis, kakaruk, smuk, mit na ol arapela kaikai na ol i wok long givim ol dispela samting long ol asples manmeri.

Mista N'Drasal i tok ol asples



man i wok long givim mariwana, hombru bia na stretim toktok long larim ol asailum sika i kisim ol asples meri.

"Dispela samting i kamap long Manus. Mipela (ol polisman) i holim sampela asples man wantaim ol asailum sika taim ol i dring bia na smok mariwana.

"Mipela i sasim ol asples aninit long lo bilong PNG tasol mipela i hat long sasim ol asailum sika bikos ol i no stap aninit long lo bilong dispela kantri," Mista N'Drasal.

• Bagarapim pikinini meri

Mista Knight i tokaut tu olsem wanpela asailum sika man i givim bel pinis long wanpela asples meri. Dispela pikinini meri i mekim Gret 5 long wanpela praimer meri skul las yia taim em i bin bungim dispela asailum sika man.

Mista Knight i les long kolim nem bilong dispela meri. Em i tok krismas bilong dispela pikinini meri i no stap long mak bilong marit.

"Tasol em i gat bel pinis. Papa bilong dispela pikinini i stap insait long bel em i dispela refuji man. Ol famili bilong dispela meri i les long dispela man tasol bihain ol i pilim sori na wanbel gen," Mista Knight i tok.

Mista Knight i pret nogut planti asples meri i kisim bel long dispela kain ol asailum sika man, we sampela bilong ol i no gutpela man.

"Ol i no gat mani na ol samting long putim pe long ol pikinini meri bilong yumi. Pasin Manus em olsem yu wanpela man yu laik maritim meri, yu mas putim pe long kisim pikinini meri.

"Mipela i pret olsem ol dispela asailum sika man bai givim bel nating long ol pikinini meri na bagarapim bihain taim bilong ol pikinini meri bilong mipela," Mista Knight i tok.

• Rabis na pipia

Memba Knight i singautim gavman long save olsem ol rabis na pipia bilong dispela prosesing senta i wok long bagarapim wara we ol manmeri i save dring.

Tasol Knight i tok wanpela kontrakta kampani husat i bin kisim kontrak long klinim ol rabis na pipia bilong prosesing senta i wok long digim bikpela hul long graun na tromoi ol rabis i go insait.

"Dispela i ken kamapim kaikain sik na manmeri i ken kisim bikpela bagarap bikos mipela i save kisim wara long graun. Dispela ol smel nogut na kemikel nogut i stap insait long dispela ol pipia i ken bagarapim wara we mipela i save kisim long graun," Mista Knight i tok.

• Lombrum neval bes

Manus em i wanpela ples insait long PNG we neval bes bilong PNG Difens Fos i stap. Mista Knight i tok ol sekyuriti bilong ri-jonal prosesing senta i save go kam insait long ples bilong ami.

"Ples bilong ami em i ples bilong ami. I no gat wanpela man o meri i mas i go insait na lukim ol samting i stap insait bikos em i samting bilong nesenel sekyuriti bilong PNG," Mista Knight i tok.

Em i tok ol PNGDF ami yet i mas lukautim dispela neval bes bikos em i nesenel sekyuriti bilong yumi olgeta.

Tasol Komanda bilong PNGDF, Brig-Gen Gilbert Toropo, i tok ol ami yet i save lukautim dispela ples.

Brig-Gen Toropo i tok no gat wanpela man nating i save go kam long banis long neval bes.

Gavman bilong Australian kirapim 42 nupela haus bilong ol ami long Lombrum neval bes.

Australia i tok moa long 400 sumatin long Lombrum Elementari and Praimeri skul bai gat nupela wara tenk na nupela toilet bilong skul.

Dispela tupela skul bai kisim tupela nupela toilet na dispela helpim i kam wantaim nupela wara pamp, tupela nupela wara tenk, ol samting bilong septik na wara tenk, ol samting bilong pawa na kapa bilong toilet haus.

Australia i kirapim ol dispela dispela nupela samting long K892,000.

• Momote-Lorengau rot projek

Mista Knight i tok wanpela kontraksen kampani bilong Australia i bin kisim kontrak long stretim Momote-Lorengau rot.

"Tasol dispela kontraksen kampani i no pinisim gut ol wok. Ol i no putim kolta gut long dispela rot na a kampani i ranawe go pinis," Mista Knight i tok.

Australia i tok dispela rot projek i wok long go het gut.

Isu namba 9 bilong Manus i go het niusleta i tok ol kontraksen wok long kirapim Momote-Lorengau rot i wok long go het gut bikos kontraksen kampani i wok long mekim sais bilong rot i go bikpela, putim ol kalvet, stretim sait sait baret bilong rot, stretim ol hul, putim ol sain bilong rot, stretim gen Loni Bris, putim peint long dispela bris na mekim ol samting long larim manmeri tu i wokabout seif gut long dispela bris.

Dispela niusleta i tok ol kontraksen wok i kamap gut long putim ol bikpela ston arere long solwara long Momote-Lorengau rot.

• Nesenel Refuji Polisi

Ol dispela asailum sika manmeri i laik go long Australia tasol aninit long wanpela agrimen namel long tupela gavman bilong Australia na PNG, ol dispela manmeri i kam stap nau long Manus.

Ol dispela lain bai no inap go bek long Australia tasol ol bai kam stap olgeta long PNG. Ol bai no inap go bek long kantri bilong ol yet o long narapela kantri.

PNG Gavman i tok orait pinis long wanpela nupela polisi long larim ol dispela asailum sika manmeri i stap olgeta long hia. Nem bilong dispela nupela polisi em i Nesenel Refuji Polisi.

Dispela polisi bai larim ol refuji manmeri i stap long PNG. PNG bai kamap nupela ples bilong ol.

Gavman bai helpim na sapatim ol dispela refuji long painim wok, painim haus na statim nupela laik long PNG.

Mnista bilong Imigresen na Boda Proteksen bilong Australia, Peter Dutton i bin amamas tru taim em i bin harim olsem PNG Gavman i wanbel long wokbung wantaim Gavman bilong Australia na larim ol dispela asailum sika o refuji stap long PNG.

Mista Dutton i mekim dispela toktok long Oktoba 23 las yia. Em i tok Gavman bilong Australia i amamas long harim olsem Gavman bilong PNG i wanbel pinis long larim ol asailum sika i stap long PNG.

Gavman bilong PNG i tok orait pinis long larim ol asailum sika manmeri i stap long PNG sapos ol i painimaut olsem ol i refuji tru.

"Gavman bilong Australia i amamas long PNG Gavman i kirapim Nesenel Refuji Polisi long larim ol dispela refuji manmeri i stap long PNG," Mista Dutton i tok.

Dispela polisi bai larim ol manmeri husat i refuji tru tru long stap olgeta long PNG aninit long Ri-jonal Risetelmen Arensmen (RRA).

"Aninit long RRA, ol asailum sika manmeri husat i kam long PNG, na husat PNG gavman i painimaut olsem ol i tru tru refuji, bai stap long PNG. No gat wanpela refuji manmeri bai stap long Australia," Mista Dutton i tok.

• Manus i go het

Australian Hai Komisin long Pot Mosbi i tok Gavman bilong Australia i wok long mekim planti gutpela samting long kirapim Manus na senisim laik bilong ol manmeri.

Long Isu namba 9 bilong Manus i go het niusleta, Australia i tok Seadler Soka asosiesen long ples N'dilou i kisim halpim long Australia long kirapim soka long komyuniti.

Dispela helpim tu i stretim wanpela bikpela soka fil long N'dilou. Dispela fil bai holim ol bikpela soka pilai.

Nupela soka fil wantaim soka ekipmen bai helpim N'dilou long kirapim gutpela sindaun long komyuniti na bai sapatim ol meri long pilai spot na stap strong na fit.

Dispela niusleta i tok Australia i wok long kirapim nupela Manus Provinsal Polis stesen. Australia bai kirapim dispela nupela polis stesen long K13 milien.

Long mun Novemba las yia, Australia i helpim Lombrum Naval bes na Lundret praimer skul long ol nupela samting long helpim ol skul pikinini i skul gut.

Lundret i kisim nupela klasrum, nupela stua rum, nupela toilet na nupela haus bilong tisa.

Australia i helpim 20 skul long Manus na sampela ol ples we praimer skul bilong ol i kisim helpim em ol, Bipi, M'buke, Baso, N'dilou, N'yada, Harangan, Lau, Pateku, Metyih, Mouklen, N'drehet, Likum, Metepong, Nohang, Waratalai, Andra, Lomoei, Aua na Wuvulu.

Wol komoditi prais pundaun givim salens long PNG maining industri

James G. Kila i raitim

2015 EM YIA NOGUT bilong planti maining risos kampani insait long wol na tu, PNG bikos wol metal prais i pundaun i go daun tru, na sampela ol maining kampani i wok long pasim wok na salim ol wokman meri bilong ol i go malolo.

Long PNG, yumi i lukim bikpela kopa main, Ok Tedi Maining Limited (OTML) long Westen provins i stopim wok bilong en na larim ol wokman meri i go malolo bikos long hevi bilong wol metal prais na tu, level bilong Flai riva i go daunbilo na sip i no inap go antap long Kiunga na kisim kopa na salim i go ovasis.

Wankain hevi tu em ol arapela maining kampani long PNG i wok long bungim na i slowim operesen bilong ol bikos kos bilong operesen i antap, na mani ol kampani i kisim long salim ol metal risos i go aut i daunbilo stret.

Ripot bilong Benk Saut Pasifik (BSP) tokaut olsem foren eksens o nupela mani we i kam insait long kantri i daunbilo.

Dispela em bikos komoditi prais long intanesenenel maket em i daubilo tru.

Maski metal prais i daunbilo na i givim hevi long ol arapela westen kampani i lukautim maining wok long PNG, tupela bikpela kampani bilong Saina i soim strong bilong ol bai gat bikpela sea long wok long maining risos long PNG. Dispela em bikpela developmen insait long ekstrekativ sekta long 2015.

Long 2015 tupela bikpela kampani bilong Saina em Zijin Grup i baim 50 pesen sea i go insait long Porgera Gol Main long Enga provins.

Zijin Grupi baim 50 pesen sea i go insait long Barrick long wok long Porgera na bai go het long developmen bilong dispela gol main.

Narapela gutpela developmen long maining industri long 2015 tu i lukim narapela kampani bilong Saina ol i kolim ol Rising Access Management i tekova o kisim ples nau long developim Frieda Riva gol/kopa projek long Wes Sepik provins.

Ol i tekova o baim sea long PanAust long karimaut wok developmen long dispela projek.

Ripot long sait long mani maining industri i bringim olsem foren eksens tu i soim olsem em i pundaun bikos long wol metal prais i bagarap.

Sif Eksekutyutiv Opisa (CEO) bilong BSP, Robin Flemingi tokaut long lukluk bilong beng long sait long foren eksens o nupela mani PNGi kisim long maining industri i soim olsem em daunbilo tru.

Dispela em bikos prais bilong wol komoditi i daunbilo.

Long PNG, wanpela maining kampani tasol we i no rausim ol wokman meri em Ramu NiCo Menesmen (MCC) long Madang provins.

Dispela nikel/kobalt maining developa i wok yet bikos long sapot i kam long mama-kampani bilong ol long Saina em MCC Grup.



Long mun Oktoba 2015 MCC Grup Vais Presiden Mista Xiao na Ramu NiCo Siaman, Mista Zongi bin kam long PNG lukim long eria bilong wok bung namel long Gavman bilong PNG na MCC Grup long gutpela ron na stap blong Ramu NiCo Projek insait long PNG.

Toktok bilong ol i pas tu long wanem ol gutpela rot i stap long helpim Ramu Projek we i ken lukim MCC Grupi kisim kaikai o win mani long invesmen bilong en long PNG.

Mista Xiaoi tok MCC Grupi bin givim bel nai sapotim gut stret Ramu NiCo Projek olgeta wan wan yia stat long taim kontrakseni bin stap 10-pela yiai go pinis.

Tasol inap nau yet MCC Grupi no kisim gutpela win-manii kam long invesmen bilong en long Ramu NiCo Projek.

PNG tu long nau yet i bungim bikpela hevi long sait long daunbilo prais bilong metal na ol maining kampani long kantri tui rausim ol wokman bilong ol long sevim kos.

Presiden bilong Ramu NiCo, Mista Wang Jichengi tokaut olsem MCC Grup nau i wok long pusim wok bilong en long kamap wantaim wanpela Nesenel Gol.

Dispela plen em long bungim ol tingting na wok plen long kamapim strongpela pos na gutpela kwaliti developmen long sait long wok na tu ol wok lain i mas wok strong.

Mista Wangi tok bikos long daunbilo prais bilong nikel maket na wol metal prais, Ramu NiCo nau i gat bikpela salens tru long wok operesen bilong en.

Olsem na olgeta wokmani mas save gut long dispela na givim moa taim na wok strong long daunim dispela salens.

"Ol bikpela kompetisen bilong mipela nau em long sait long prodak bilong mipela, ol masin blong wok na wok mipelai mas wokim stret," Mista Wangi tok.

Presiden i tok stat long neks yia, bai gat tripela bikpela wok mak. Namba wan em olgeta wok mani mas gat gutpela tingting long abrusim ol salens.

Namba tu em olgeta woki mas bihainim stret plen wei stap long wokim wok, na namba tri em Ramu NiCo bai putim kamap moa kontrol long daunim ol kos na wokim wok stret long sapotim stap bilong kampani long PNG.

1. Bikpela miksing masin long Basamuk Refaineri long Madang.

2. Ol maining wokman givim taim long wok.

3. Bikpela maining trak lodim mineral.

PPC Singura i amamas long ol Madang polis

PROVINSAL Polis Komanda bilong Madang, Jacob Singura, i amamas long ol polis man na meri bilong em long mekim gutpela wok long taim bilong Krismas na Nu Yia.

Bihain long kain kain ripot i wok long kamap long Madang provins, dispela Krismas na Nu Yia i kamap seif na olgeta pipel i selebretim gut wantaim gutpela wok bilong ol polis manmeri.

PPC Singura i tok dispela i soim wok bilong ol polis long ol taun na ol rurel hap

tu long dispela yia.

Em i lukluk long karim aut awenes long wok bilong polis long ol komyuniti insait long provins, na bai em i makim long karamapim ol rurel hap.

Singura i tok taim em i kisim ples bilong Sylvester Kalaut olsem PPC em i bin raun lukim ol sampela ples olsem Siar, Yabob na sampela moa.

Em i toktok long luksave long hevi bilong haus bilong ol polis long dispela yia.

Ekting Polis Komisina i amamas long bel isi selebresen

EKTING Deputi Polis Komisina Jim Andrews i tok tenkyu long ol memba bilong Royal Papua Niugini Konstabluri (RPNGC) na ol pipel bilong Papua Niugini long seif na bel isi Krismas na Nu Yia selebresen.

Deputi Komisina Andrews i tok tenkyu long ol memba bilong RPNGC insait long kantri long taim bilong ol na wok bilong ol long dispela amamas taim wok we bai i pinis neks wik long kamapim seif na bel isi Krismas na Nu Yia sele-



Ekting Deputi Polis Komisina, Jim Andrews.

bresen.

Mista Andrews i tok nogat wanpela bikpela hevi i bin kamap long taim bilong Krismas na Nu Yia

long olgeta hap long kantri. Tasol i bin gat tupela hevi i kamap long Is Sepik provins na narapela long Magi Haiwe long Sentral

provins. Sampela pipel i bin dai long dispela tupela hevi.

'Tasol dispela em orait na i no olsem ol narapela taim long Krismas na Nu Yia i bin save gat planti hevi,' Mista Andrews i tok.

Mista Andrews i askim ol pablik long go het na wok bung wantaim long luksave olsem 2016 bai kamap seif yia na bel isi pasin bai i ken stap. Em i askim ol polisman na meri long go het na mekim wok bilong ol na i no ken pret o wan sait.

Haus bilong ol polis i kamap hevi long Noten Koman

ASISTEN Polis Komanda bilong Noten Koman, Peter Guinness i putim haus bilong ol polis namba wan long dispela yia olsem hap bilong divisenele stretejik plen.

Em i tok olsem i gat graun insait long Lae siti long bildim nupela divisenele hetkwata na polis hetkwata bi-

long Morobe provins.

Gavman i bin mekim wanpela komitmen pinis long mekim 6000 haus bilong ol polis insait long kantri. Em i askim sampela bilong ol dispela haus long kamap long Noten koman long pinis bilong dispela yia.

Em i tok em long taun o rurel hap, em bai traime long

luksave olsem i gat graun i stap nating bilong bildim ol haus aninit long koman bilong em.

Mista Guinness i askim Morobe PPC na Metropolitan Suprintenden na ol narapela sinia opisa long toktok long ol tingting long karim Noten koman i go het.

Sif Polis Opisa i sapatim toktok bilong PM

EKTING Deputi Komisina na Sif bilong Operesen, Jim Andrews i sapatim toktok bilong Praisim Minista Peter O'Neill long rausim ol korapt na ol bikhet polis.

'Mipela bai mekim wok painim aut long ol dispela lain na husat i mekim ol dispela pasin bai mipela i painim aut na mekim save

long ol,' Mista Andrews i tok.

Em i tok, 'Polis brutaliti na ol bikhet pasin ol polis i save mekim em ol isu we menesmen bilong polis tasol i ken stretim.'

'Mipela i gat ol namba wan disiplin standet na ol gutpela rot long stretim ol polis na lukaut long ol tasol

hevi bilong mipela i stap wantaim implimentesen na karim aut ol dispela rot.

'Long dispela mi bai salim toktok i go long ol Rijinel Polis Komanda long luksave olsem Metropolitan Suprintenden na ol PPC i mas kontrolim ol man bilong ol gut bikos ol bai kisim hevi sapos ol polisman i wok aninit long ol i bikhet na brukim lo,' Mista Andrews i tok.

Andrews i laik lukim ol komanda i mekim save long ol na kontrolim ol. Em i tok olsem dispela piksa we ol polisman i fosim wanpela meri long daunim kondom we ol i inap long painim ol pinis na sasim ol. Sapos nogat em i laik save long wanem as dispela i no kamap yet na i wet long Komisina na ol sinia menesmen long kam daun na mekim wok bilong ol.

Deputi Komisina Andrews i tok NCD i bikpela hap i wok long brukim lo long polis brutaliti na ol narapela hevi tu. Em i tok NCD em i PNG long wanem taim ol i stretim dispela hevi bai ol narapela provins bai i bihainim.

Em i tok long mekim dispela muv long karim aut disiplin na koman bai em i kamapim wanpela komiti insait long Intanel Afes Dairektoret long stretim ol dispela hevi.

'Mi bilip olsem mipela i gat sampela Notis bilong Penalti (NOP's) we ol i bai givim aut long ol memba tasol ol i no givim aut yet long planti as o risen. Dispela komiti bai wok wantaim Intanel Afes Dairektoret long painim aut stetus bilong NOP,' Deputi Komisina Andrews i tok.

Strong bilong papa holim laip bilong pikinini

Stori i kam long 'The Trumphet'

WANPELA famili long Houston, Texas, Yunaitet Stets i bin selebretim wanpela mirakel Krismas stret long las yia krismas.

Wanpela nius stori i kam long niuspepa bilong Texas, 'The Trumphet' i ranim dispela gutpela krismas stori.

Pikinini man bilong George Pickering II, nem bilong em George Pickering III i bin wok long stap long laip sapat masin long haus sik long holim laip bilong em inap long sampela taim. Ol dokta i bin laik rausim laip sapat masin long em tasol papa bilong em i stopim bikos em i bilip olsem pikinini bilong em i stap laip yet.

George Pickering III, tasol papa bilong em i holim gan na i holim pas long masin bikos em i tok, pikinini bilong em i no dai yet.

Long las yia 2015 planti samting i bin kamap long dispela man, George Pickering II na pikinini man bilong em, George Pickering III. George Junia i kam bek laip olgeta bihain long em i bin hap dai longpela taim. Tasol papa bilong em yet i bin sevim laip bilong em.

Taim George Pickering Snr. harim olsem ol dokta ino inap long mekim



Haus sik bet long Tomball Rijonal Medikal Senta long Houston.

wanpela moa samting long holim laip bilong pikinini bilong em, em i go dring spak na i go insait long Tomball Rijonal Medikal Senta long Houston, Texas long was olsem ol i mas givim sans long pikinini bilong em long em bai kamap orait gen.

George Sr. i pasim dua na em yet wantaim pikinini bilong husat i gat 27 krismas i stap insait na em i strong long stopim ol polis tu long go insait, pastaim long wanpela gutpela samting tru i kamap. Em i no wari long em i go long kalabus.

"Klostu long ol polis i kam insait na holim pasim George Snr. Bihain

long samting olsem 3 aua, em i bin pilim pikinini bilong em i bengim strong han bilong em," Famili loiya, Phoebe Smith i tok.

"Long dispela taim, SWAT tim i opim dua pinis long kritikel ke rum na papa George i givim em yet long polis, tasol em i save olsem pikinini bilong em i bengim han bilong em," em i tok.

George Jr. i bin kisim hat atek long Januari 2015. Ol dokta i tok olsem kru bilong em i dai pinis na ol narapela famili memba i bin wanbel long rausim laip sapat masin long en na larim em i dai tasol papa George II i no laik.

Bihain long, George Sr. i pilim olsem pikinini bilong em i stap laip yet, em i givim yet isi tasol i go long ol polis. George Sr. i go kalabus inap long 10-pela mun. Em i bin kamaut long Desemba, klostu taim tasol long Krismas de.

"Papa bilong mi i brukim wanpela lo, tasol long gutpela as. Mi stap laip tude bikos long dispela. Em i pasin bilong laikim tasol i kamapim dispela mirakel," George III i tok.

"Bikpela samting em mi stap laip nau na papa bilong mi i kam bek na mipela olgeta i stap wantaim gen," George Jnr. i tok.

Ol woklain bilong ANG i raun go long Chesire Home

KRISMAS i wanpela taim bilong salim aut pasin bilong amamas, taim bilong skelim samting na lukaut long narapela.

Dispela em sampela woklain bilong Air Niugini (ANG) i mekim taim ol i raun go lukim ol pikinini wantaim disabiliti long Chesire Home long Pot Mosbi las wik.

Ol woklain bilong ANG long Kopret Kwaliti na Sefti Dipatmen i mekim ol pikinini smail taim ol i givim ol presen beg wantaim ol samting insait.

Grup lida, Sonia Sebulon i tok tim bilong em i mekim sampela fandresing long sosal klap bilong ol long las yia inap ol i mekim mani long baim ol presen bilong ol pikinini.

Sonia i tok, 'Mipela inap long baim ol liklik samting olsem ol soklet, swit bisket, frut, ol samting toilet, ol kaikai i save stap long tin na rais.

Tasol, bikpela samting em mipela i lukim smail long pes bilong ol dispela pikinini i mekim mipela pilim gut.'

Ol woklain bilong ANG i baim tu ol hotdog, ol dring na ol apel

we ol i skelim wantaim ol pikinini long belo taim.

Dispela raun i go long Chesire Homes em ol woklain yet i mekim long tingting bilong ol na ol i tingting long mekim bikpela na gutpela samting long ol pikinini long dispela yia.

Long wankain taim, Chesire Home Edmin Asisten, Manula Igo i tok operesen bilong Chesire Homes i save stap long strong bilong ol donesen long wan wan, ol ogenaisesen na kain pasin bilong ol ANG woklain i gat bikpela mining tru.

'Planti bilong ol dispela pikinini i no save long ol papamama bilong ol. Long 21 pikinini mipela i save lukautim long hia, olsem 5-pela i gat papamama we ol i save raun kam lukim ol tasol ol narapela ol woklain i save lukautim.

Long dispela, karim aut amamas pasin, skelim wantaim ol na mekim ol smail i save mekim mipela amamas,' Misis Igo i tok.

I gat 21 pikinini wantaim disabiliti husat i kam long olgeta hap long PNG na i stap long Chesire Homes long Pot Mosbi. Ol 13 woklain i save lukautim ol.



Ol disaibol wantaim ol wokmanmeri long Chesire Homes. Intanet foto

**On
it's 16th
year**

WHY STUDY AT ITI??

International Training Institute is Accredited
by the Government as a
HIGHER EDUCATION PROVIDER!

ITI's Affiliations & Associations with:

- ➔ USQ - University of Southern Queensland
- ➔ ACBM - Australian College of Business Studies
- ➔ AGI - Acharya Group of Institutes in partnership with International Pathway Program (IEPP)
- ➔ IFTDO - International Federation of Training & Development Organisation
- ➔ AAT - Association of Accounting Technician
- ➔ CPA PNG - Certificate of Practising Accountants of Papua New Guinea
- ➔ PNG HRI - Papua New Guinea Human Resource Institute
- ➔ ITI is also a Leading Private Institution in Papua New Guinea
- ➔ There are 6 campuses for you to choose from.
- ➔ Certificate courses in: Sales, Business, Accounting, Human Resource Management & Computing.
- ➔ Diploma courses in: Accounting, Management, Marketing, Human Resource Management, Information Systems, Internet Technology, Networking & Infomation Technology.
- ➔ Advanced Diploma in Accounting

Drop-off, Transport
provided for Night
Class Students

We
offer Day &
Nigh Classes

**Application is OPEN for January Intake
in all 6 Campuses!**

**Orientation week:
January 13 - 15**

**Apply now to
secure your space!!!**

*"Investing in Quality & Affordable Education
for your Future"*

INTERNATIONAL
TRAINING
INSTITUTE

ITI i givim K2000 long WHP EI Nino

INTENESENEL Trening Institut (ITI) em i namba wan skul long bekim askim bilong Westen Hailans El Nino Draut Apil we ol i givim K2,000 long helpim ol komyuniti i kisim bikpela bagarap long strongpela san.

Menesing Dairekta (MD) bilong ITI, Kumaran Senthayval i givim sek mani long tupela komiti memba bilong WHP Draut Apil, Evelyn Mara long ITI Pot Mosbi Kempas.

Westen Hailans i bin wanpela bilong ol provins we i bin kisim bikpela bagarap na i stap long Kategori 5.

Ol kaikai long gaden na ol hap bilong kisim wara i bin drai. Dispela i mekim na ol pipel i bin sot long kaikai na wara i wanpela bikpela hevi ol pipel i lukim.

ITI i amamas tru long helpim ol pipel husat i nidim helpim long taim bilong ol humeniterian hevi i kamap.

Olgeta mani ol i bungim bai Caritas PNG i yusim aninit long Katolik Asdaisos bilong Maun Hagen long helpim ol komyuniti long Westen Hailans provins.

Olgeta mani ol i bungim bai Caritas PNG i yusim aninit long Katolik Asdaisos bilong Maun Hagen long helpim ol komyuniti long Westen Hailans provins.

(Lephan- Raithan): ITI Edmin Menesa, Nama Makindi, Komiti memba bilong WHP Draut Apil, Evelyn Mara, Peter Komon husat i sekanim MD bilong ITI, Kumaran Senthayval na ITI Kopret Menesa Maketing Menesa, Semi Rose.

Skul bai stat long Februeri

Program bilong ol ripota i op

YUNAITET Stet (U.S)Em-basi i amamas long tokaut olsem Is-Wes Senta long Honolulu, long Hawaii i kisim ol eplikesen bilong 2016 Jefferson Felosip program.

Jefferson Felosip i givim ol prin na brodkas jenelis long U.S, Esia na Pasifik Ailan wanpela narapela kain sans long lukluk long graun na bildim intenesenel netwok long mekim gut wok bilong ol long ripot. Dispela bai kamap wantaim wanpela wik edukesen na semina long Is-Wes Senta long Honolulu na bihain bai gat tupela wik program bilong raun na lukim ples long Esia Pasifik U.S rijon.

Bikpela driman bilong

dispela program em long kirapim pablik andastand-ing insait long nius midia bilong ol kalsa, ol isu, na ol stail long Esia Pasifik rijon.

Long stap insait long dispela Jefferson Felosip i save givim ol jenelis gutpela save long ol bikpela rijinel isu, ol profesenel kontek, na longpela pasin bilong poroman wantaim ol wantok long dispela program na tu long save gut long ol intanesenel netwok olsem long 1,000 midia profesenel a 50,000 alumni bilong Is-Wes Senta.

Freeman Foundation bilong Stowe, Vermont na ol nius ogenaisesen, U.S gavman na ol narapela faundesin i sapatim dispela program.

Dispela mani bai baim 12-pela skolasip, olsem 4 o 5 bilong ol Amerika jenelis na 7 o 8 bilong ol Esia Pasifik jenelis. Olgeta jenelis husat i stap insait long program, i mas baim program fi bilong \$800 U.S long karamapim kos we skolasip mani i no baim.

Husat i stap insait long dispela i mas baim eplikesen fi bilong visa, ol pemen long visa, helt insurens, na ol kago fi. Olgeta sponsa bilong wanpela jenelis bai mani mak \$5, 125 U.S na tu intanesenel balus fe.

Ol pipel bai stap insait long program wantaim kampani em i wok long en i mas skelim kos bilong dispela. U.S Embasi bai i lukluk long proposal bilong jenelis na midia ogenais-

esen bilong sponsasip na skelim kos.

Taim bilong stop long salim eplikesen bilong Jefferson Felosip program em long Januari 29, long dispela yia. Prin, brodkas na on-lain jenelis i wok long U.S, Esia na Pasifik Ailan ken aplai. Ol i laikim jenelis wantaim 5-pela yia ekspiriens na husat i save gut long Inglis.

Het tok bilong 2016 Jefferson Felosip program em 'Future of Growth in Asia Pacific' na program bai stat long Epril 30 inap long Me 22.

Ol bai raun i go long Honolulu, Hawaii; Beijing na Guiyang, Saina na Tokyo na Fukuoka-Kitakyushu long Japan.

Esther Bralyn Wani i raitim

OLGETA skul insait long kantri bai i statim klas long Mande Februeri 1 long dispela yia. Nesenel Dipatmen bilong Edukesen (NDoE) i tokaut long dispela.

Long dispela yia, Tem1 bai i gat 11-pela wik na bai i pinis long Epril 15 we Tem 1 holido bai stat long Epril 15.

Olgeta tisa long olgeta edukesen institusen wantaim FODE bai i statim wok

bilong ol long Mande 25 Januari.

Long wankain taim, Edukesen Dipatmen i tokaut olsem ol FODE sumatin i ken kisim edvais long ol Provincial Senta bilong ol long Mande Januari 18.

Tising Sevis Komisin i laik tok save long ol tisa olsem opis bilong ol long Fincorp Haus long Waigani bai i opneks wik Mande long 11 Januari.

Ol 23, 887 gret 10 sumatin bai go long gret 11

Esther Bralyn Wani i raitim

NESENEL Dipatmen bilong Edukesen (NDoE) i tok aut olsem 23 887 Gret 10 sumatin bai i go het long mekim gret 11 long ol Sekenderi skul o Nesenel Haiskul long Papua Niugini.

Long dispela, insait long 59 841 Gret 10 sumatin i mekim Gret 10 neseneleksam long Oktoba 12 inap long 16 long 2015, olsem 35, 954 gret 10 sumatin bai i no gat sans long go het long mekim Gret 11 long 2016.

Long wankain taim, 24, 170 gret 12 sumatin i mekim Gret 12 neseneleksam bai i wet long bikpela institusen olsem ol kolis na yunivesiti bai i salim lista bilong ol i kam aut bihain.

Tasol, nem lista bilong Yunivesiti bilong Papua Niugini i kamap pinis long websait bilong Edukesen Dipatmen.

Edukesen Dipatmen i tok ol Gret 12 sumatin i ken wet na putim was long ol niuspepa long sekim ol nem bilong ol bai i kamap long ol kolis o yunivesiti.



Pablik na Gavman Afes Operesen Menesa bilong EMPNG, Nora Scheller (lephan) i givim ol set long Jenerel Menesa bilong Chesire Disabiliti Sevis PNG, Bernard Ayieko wantaim sampela pikinini i redi long kisim set.

Givim strong long ol pipel wantaim disabiliti

EXXONMOBIL Papua Niugini i sapatim Chesire Disabiliti Sevis PNG long Hohola long Pot Mosbi wantaim mani long helpim long selebretim Intanesenel De bilong ol Disabiliti.

Dispela de i makim long promotim de bilong save gut long ol hevi bilong disabiliti na bungim ol sapat bilong digniti, rait na gutpela sindaun bilong ol pipel i stap wantaim disabiliti.

Intanesenel De bilong ol pipel wantaim Disabiliti long dispela de em i kamap spesel tumas wantaim Chesire Disabiliti Sevis bikos em i gat amamas taim bilong ol pikinini wantaim disabiliti na lukautim ol liklik pikinini husat i pinisim inklusiv edukesen na skul bilong ol liklik pikinini developmen program na bai i go insait long bikpela skul long 2016.

Olsem 140 spesel nid sumatin i pinisim gut dispela

program na bai ol i go insait long bikpela skul neks yia.

Pablik na Gavman Afes Operesen Menesa bilong ExxonMobil, Nora Scheller i tok ExxonMobil i amamas long stap insait long dispela selebren na amamas long Chesire Disabiliti Sevis long wok bilong ol long mekim gutpela wok long kamapim senis long laip bilong ol pipel wantaim disabiliti.

'Long kain sapat bilong ol ogenaisesen olsem Chesire Dis-

abiliti Sevis, we ol pipel wantaim ol disabiliti i kisim strong long mekim bikpela ol kontribusen long ol famili na komyuniti bilong ol,' Scheller i tok.

Olsem 60 woklam na ol fil woklain, 200 papamama na 200 pipel i stap wantaim disabiliti bai i bung long amamasim dispela de. Mani i kam long ExxonMobil PNG ol i yusim long baim set.



Ol sumating i sekim nem long lista bilong Gret 10.

Planti marasin tumas i no gutpela

PASIN bilong kisim pen marasin bihain long pati long nait we ol i dring planti bia o alkohol inap long kamapim birua long bodi.

Wanpela helt toktok i kam long wanpela marasin kampani bilong Australia, NPS MedicineWise i tok lukaut long ol man na meri husat i save laik kisim ol marasin bilong kilim pen taim ol i gat bia o alkohol i stap yet long bodi bilong ol, taim ol i no kisim gutpela slip long nait .

Ripot i tok, olgeta taim sapos ol pipel go long wanpela pati long nait na i go long moning taim ol i save laik kisim ol marasin bilong kilim pen long traime long daunim ol pen na skin les bilong i no gat gutpela slip long nait o i no gat gutpela malolo long bodi.

Ripot i tok moa olsem ol lain huast i laikim kisim pen marasin ol i mas save pastaim long wanem kain birua inap kamap long ol. Na

sapos i gat sampela alkohol insait long bodi pinis i gat narapela birua i kamap long bodi sapos ol i kisim marasin abrusim mak. Wanpela bikpela paul tingting i save kamap em ol man i save tingting olsem, sapos ol i kisim moa marasin winim mak bilong en sapos yu no pilim gut, em bai marasin i wok hariap moa.

Mis Sarah Spagnardi, famasis i makim NPS MedicineWise, na i tok em i gutpela long ol pipel i stap seif na ol i no ken kisim hevi i save kamap long kisim ol marasin bilong kilim pen.

“Eksampel olsem, ol man na meri i save laik dring moa paracetamol winim namba mak we i stap long karamap bilong en. Dispela inap kamap olsem ovados o dring tumas na em inap kamapim sampela birua long bodi,” em i tok.

Paracetamol inap bagarapim liva sapos yu kisim moa

long mak bilong en. Taim dispela marasin i bungim strong wantaim kefein inap long mekim man o meri bai painim hat long slip na kamapim hetpen. Em i save kamapim kefein toksisiti we i save bagarapim lewa o hat na kamapim hat atek.

Ol narapela marasin bilong kilim pen olsem aspirin, ibuprofen na diclofenac inap kamapim bagarap tu sapos ol lain i kisim planti tumas.

Mis Spagnardi i givim tok lukaut olsem, “Sapos yu bin wok long dring bia o strongpela dring, yu mas tingim olgeta taim olsem ol marasin bilong kilim pen olsem aspirin, ibuprofen o naproxen inap kamapim bagarap taim em i bungim strongpela dring o alkohol na em inap kamapim bel pen, sua na blut insait long bel.

Alkohol inap long kukim insait bilong bel. Na blut insait long bel em i no save gat pen, olsem na ol lain bai i no

inap tingim olsem i no gat hevi long dispela.”

Ripot i tok, sapos man o meri i dring liklik tasol em bai i no gat hevi, tasol sapos em i dring bikpela o dring klostu, klostu na kisim pen marasin long wankain taim, em inap long kamapim blut insait long bel.

Sapos ol man o meri i kisim moa marasin winim mak bilong kisim, em i ken pasim rot bilong kisim win, long taim i gat alkohol o bia long bodi.

“Nau sapos yu tingting long kisim pen marasin bihain long yu dring bia tumas, askim dokta bilong yu pastaim bikos alkohol i no save pinis hariap long bodi inap planti aua bihain.

Tasol i no marasin na alkohol tasol bai bagarapim bodi taim yu bungim tupela wantaim, nogat, alkohol o bia em yet i no gutpela long bodi bilong yu olgeta taim na em i ken bagarapim bodi bilong yu olgeta taim bihain long yu dring,” Mis Spagnardi i tok.

Marasin bilong pasim kela long kamap

Frieda Sila Kana i raitim

WANPELA lip diwai long Papua Niugini em inap long pasim rot bilong kela kamap long ol yangpela man.

Wanpela yangpela man bilong Wes Nu Briten i bin stori wantaim Wantok Niuspepa na em i tok olsem nau em i gat wanpela bus marasin bilong helpim gras bilong ol man i no ken pundaun na kamapim kela. Dispela wankain marasin tu em i painimaut long ol man i kisim olsem em inap long stretim skin long i no ken go slesk long taim ol man i go lapun na tu em i stopim dendraf o strongpela grille long het long kamap.

Dispela yangpela man, Jubilee Wartaim em i dairekta na produsa bilong dispela bus marasin na bisnis nem bilong em i ‘Jubilee Wartaim Hebalist – Director Jubilee. Nau yet em i wok long tripela provins em long Wes Nu Briten yet, Is Nu Briten na nau em i stap long Nesanel Kapital long tokaut long dispela marasin prodak bilong em.

Mista Wartaim i tok, em i givim dispela marasin nem long nem bilong tumbuna



Jubilee Wartaim i holim tupela botol marasin long soim.

kandre bilong em. Em i tok olsem, bipo ol tumbuna i save yusim dispela lip diwai long wasim na klinim gras bilong ol. Tasol kandre papa bilong papa bilong em i bin tokim papa bilong em long traime dispela lip long wasim gras bilong em taim em i lukim olsem pikinini bilong em i wok long lusim sampela gras.

“Taim papa bilong mi i harim tok bilong kandre bilong em na em i wasim gras bilong em, senis i bin kamap long gras bilong em. Olsem na long yia 2001 papa bilong mi i tokim mi long dispela marasin na mi wasim gras bilong mi long stopim dispela

sik i no ken kamap long mi,” Jubilee i tok.

Mista Wartaim i tok em i bin toktok wantaim wanpela dokta long strongim tingting bilong dispela marasin na em i kisim tok tru long dispela. Em i tok olsem ‘kela em i wanpela disis o sik’.

“Bipo taim klaimet senis i no kamap bikpela yet, em ol man i save go long bikpela krismas olsem 60 na 70 na ol i save kamap kela. Tasol nau em nogat, ol man i stap long 18-25 yia tasol na ol i kisim kela. “Pastaim ol man i save tok olsem sapos papa bilong yu i gat kela em yu bai kisim kela tu bikos dispela sik em i save bihainim blut bilong

papa. “Tasol taim mi wok long go wantaim dispela hebel marasin long helpim ol man em mi lukim olsem tupela samting i save kamapim kela. Wanpela em dandraf o doti long het na narapela em Stres o hevi bilong wok.” Mista Wartaim i tok.

Dandraf kamap em i save pasim ol hul long as bilong gras na hat long het i no save go ausait na no gat gutpela win i save go insait long het sel.

Tasol taim yu putim dispela marasin bai yu pilim kol i go insait long het bikos hatpela win bai go ausat.

Long stres em taim ol man i save stadi tumas i go ova nait o ol i gat planti hevi em ol i no save slip gut na dispela i save mekim het i hevi na i no gat win i go insait long het. Komyunikesen long kru bilong het i go long ol hul long as bilong gras i no save go gut.

Mista Wartaim nau i wok long salim dispela marasin long tupela sais botol. Wanpela 300 ml botol em K60 na narapela 500 ml botol em K100. Em i salim dispela prodak long 233 man long yia 2014 na ol i ting olsem dispela marasin i wok gut tru.



EMPNG Hides Ges Kondisening Plent senia Fil Suprintenden, Ken Rhyason na Sista Agnes Yanari katim plawa leis long opim nupela helt senta.

ExxonMobil stretim 55 yia helt senta

EXXONMOBIL PNG Limited (EMPNG), wantaim patnasip bilong Evanjelikel Sios bilong Papua Niugini (ECPNG) i stretim pinis Benaria Sab-Helt Senta insait long Komo Magarima Distrik bilong Hela Provins long pinis bilong las yia.

Dispela sab-helt senta em ol i bin kirapim long yia 1960 yet na em i save helpim 17,000 pipel bilong ples Benaria na ol ples arere long en.

ECPNG Misin i ranim dispela sab-helt senta na em wanpela tasol i save lukautim ol pipel long dispela eria long Benaria Awatangi rijon. Narapela pablik haus sik em long Tari we em i olsem wan aua long ran long kar i go.

Dispela em i namba wan taim long wanpela kain mentenens olsem i kamap long ol i wokim ol plaming wok. Long taim ol ECPNG sios i bin kirapim dispela helt senta 55 yia i go pinis, dispela em i namba wan taim long wanpela mentenens i kamap long en.

Ol i bin pinisim dispela wok wantaim mani mak bilong K53,000. Nupela mentenens wok i bin gat wanpela nupela sola pawa lait, nupela ol wara tep, na nupela dispenser bilong sab-helt senta. Dispela wok i bin pinis insait long foapela wik tasol. Liklik taim bihain bai ol i bin putim wanpela nupela hai frikwensi imejensi redio entena .

EMPNG Hides Ges Kondisening Plent Senia Fil Suprintenden, Ken Rhyason, i bin stap long hendova seremoni na i tok, helt em i wanpela prairiti fokus eria bilong ExxonMobil PNG komyuniti invesmen program.

“Mipela bilip long putim mani long ol gutpela komyuniti wok olsem long stretim Benaria Sab-Helt Senta. Mipela inap long senisim laip sindaun bilong ol lokal komyuniti na long kantri,” Mista Rhyason i tok.

Em i tok moa olsem ExxonMobil i amamas long helpim komyuniti na em i tok strong long ol yet mas lukautim gut ol fasiliti na yusim gut.

ECPNG helt edvaisa, James Robin i tok tenkyu long EMPNG long stretim helt senta.

“Ol pipel bilong Benaria i gat bikpela amamas long helpim bilong ExxonMobil bikos 55 yia taim em i bin stap, ol i no bin wokim wanpela mentenens long en. Maski em i save lukautim bikpela populesen long dispela rijon,” Robin i tok.



EMPNG Hides Ges Kondisening Plent Senia Fil Suprintenden Ken Rhyason (hankais), EMPNG Viles Liaison Opisa, Peter Ponabe (hansut) na Sista Agnes Yanari wantaim ol pikinini amamas wantaim long taim bilong kisim nupela helt senta fasiliti.

Sikret pren serim presen long amamasim Nu Yia

James G. Kila i raitim

PASIN long tok gutbai long olpela yia na welkam long nupela yia na serim presen namel long ol pren na famili memba i kamap olsem wanpela kastom nau long ol taun na siti. Ol lain long rurel viles long PNG tude tu i save serim presen tu long amamasim Nu Yia na tok gut-bai long olpela yia.

Planti taim ol liklik pikinini long skul na tu long ol Sande skul i save gat dispela pasin long soim amamas namel long ol yet ol i kolim 'sikret pren' we ol i save baim presen na givim i go long pren bilong ol. Dispela ol presen em ol pren i no save, na tu ol i save guria stret na amamas wantaim taim ol i ol i opim pases na lukim presen na lukim nem bilong lain i salim presen long ol.

Long Fonde 31 Desemba,

9-pela meri husat i wok wantaim Raibus Enjinerung Limtet (REL) long Madang i wokim wanpela liklik kaikai long amamas namel long ol yet long tok gutbai long 2015. Long dispela liklik kaikai, ol i kolim aut ol 'sikret pren' bilong ol namel long ol yet na givim presen i go kam.

Elizabeth Tuya, tim lida bilong ol Raibus Enjinerung meri long Glas Haus long Seksen 95, Lot 18, i kamap wantaim naispela tingting we ol dispela 9-pela wanwok meri bai serim presen namel long ol yet.

Elizabeth i tok ol meri yet i kontribut K10 na baim liklik kaikai na abus na ol i kukim na serim namel long ol yet na serim presen.

"Mipela liklik lain meri ya save amamas long wok-bung wantaim olsem ol susa, na mipela laik amamasim pinis bilong 2015 na lukluk i go

long 2016 wantaim gutpela bel na tingting," Elizabeth i tok.

Long dispela taim tu ol i askim bos bilong ol bilong Saina, Li Shou Zhi long go stap wantaim ol long lukim ol i givim presen i go kam.

Naispela pasin tu i kamap long dispela we i lukim ol meri ya i givim wanpela bikpela boks presen i go long bos bilong mi Mista Li.

Mista Li i amamas tru long ol dispela wokmeri na i smail na mekim bikpela tok-amamas i go long ol dispela wokmeri long gutpela pasin bilong bung-wantaim na wokim liklik kaikai na givim presen i go kam namel long ol yet.

Tim lida bilong ol meri REL, Elizabeth i tok bosman bilong ol Mista Li em wanpela hatpela man long taim bilong wok, tasol ol amamas long wok wantaim em na ol

i givim presen long em.

Elizabeth i stori olsem em i kamap wantaim dispela tingting long ol meri husat i save wok long Glass Haus, em Operesen Bes bilong Ramu NiCo.

Mista Li i bin amamas long presen em ol meri i givim long em na wantu stret em i karim i go na soim ol wantok bilong em bilong Saina na hariap tru ol guria long opim. Taim ol i opim maus bilong presen ya, wanpela bikpela man kakaruk i kalap i kamaut. Ol lain bilong Mista Li i amamas stret olsem long Nu Yia nait ol bai kaikai mit bilong naispela kakaruk bilong ples na dring gutpela sup.

Ol dispela meri bilong REL i save gut stret na redim wanpela ples kakaruk olsem presen na givim long bos bilong ol Mista Li. Dispela em naispela presen bikos planti ol China lain i save laikim ol kakaruk bilong ples.



Yut, Meri na Famili

Pastor
Barbara Lunge

Abrusim pasin nogut long 2016

OL tait wara bilong gutpela pasin i kam long mani na ol kago na ol pasin nogut em i save ran wantaim long sait, sait.

Buk Aisaia 59:19 i tok, "Bikpela bai kam olsem bikpela wara i tait taim win bilong Bikpela i kirap na sakim wara na mekim wara i ran spit tru.

Na ol manmeri long olgeta hap bilong graun, stat long hap sankamap na i go inap long hap san i go daun, ol bai i save long strong na biknem bilong Bikpela, na ol bai i pret long nem bilong en na ol bai i aninit long en."

Yumi mas gat pret long God na larim standet bilong em i kam insait long laip bilong yumi, wantaim ol famili bilong yumi. Yumi mas wokabaut insait long ol wei bilong Kingdom bilong bringim bel isi bilong God we i bin krungutim het bilong Satan aninit long lek bilong yumi.

Buk Rom 16:20 i tok, "Na long liklik taim, God bilong givim gutpela sindaun na bel isi long yumi, em bai i larim yupela i krungutim Satan aninit long lek bilong yupela. Marimari bilong Jisas, Bikpela bilong yumi, em i ken i stap wantaim yupela."

Taim yumi wok long go long hapsait bilong wara wantaim ol ston bilong yumi tingim bek dispela taim, long kem bilong yumi olsem long buk bilong Josua i makim ol presen bilong God long yumi ken bagarapim ol pawa bilong birua.

"Yu mas makim 12-pela man, wanpela wanpela man long olgeta lain bilong Israel." (Josua 4:2). Ston olsem mak bilong presen Bikpela God i givim yu long mekim wok bilong bagarapim birua.

"Ol Israel i lukim ol samting Bikpela i mekim long dispela de, na ol i litimapim nem bilong Josua olsem olgeta de ol i bin mekim long Moses, i go inap long taim Moses i dai. (Josua 4:14) na Josua i sanpim dispela 12-pela ston ol man i bin kisim long Jordan. Na Josua i tokim ol Israel olsem, 'Bi-hain, sapos ol pikinini i askim papa bilong ol, 'Bilong wanem ol dispela ston i stap, orait ol papa i ken tokim ol olsem,

Ol dispela ston i stap olsem mak bilong ol Israel i bin brukim wara, olsem bipo em i bin mekim drai solwara Retsi na yumi brukim na i kam. Bikpela i mekim dispela samting bai olgeta man bilong olgeta hap bilong graun i ken save long strong bilong em, na bai yupela i ken lotu long God, Bikpela bilong yupela oltaim. (Josh 4:20-24).

I gat sampela samting long tokim yu o givim yu long mekim yia bilong yu long 2016 i kamap gutpela tru wantaim Jisas i go inap long pinis bilong en. Namba wan em long toktok bilong yu wantaim Bikpela. (Phil 3:10)

Namba tu, ritim Tok bilong God na wokim Stadi long yu bai stap winman na i gat planti samting bilong graun. (Phil 3:10). (Joshua 1:8) Na las tru o long pinisim tok, yu mas autim testimoni bilong yu na ol narapela na serim blesing bilong yu wantaim ol narapela.

Hepi Niu Yia!!

BSP i helpim komyuniti projek

BANK Saut Pasifik (BSP) i mekim wanpela moa gutpela pasin long blesim Pot Mosbi Siti Misin na Haus Ruth i lukim sampela gutpela samting bilong mekim wok bilong helpim ol tarangu meri na ol yangpela insait long yia 2016.

Klostu long pinis bilong mun Desemba long las yia 2015, ol wokman na wokmeri bilong Pot Mosbi na Boroko Brens bilong BSP i bung na bringim dispela projek i go long dispela tupela ples bikos ol i save givim moa taim na helpim ol meri na yangpela bilong Pot Mosbi.

BSP Pot Mosbi Brens woklain i stretim na penim Haus Ruth Kitsen, stretim liklik rot bilong wokabaut na baim nupela lapap bilong ol meri long samapim ol laplap bilong windua long komon rum.

Bilong pinisim gut wok bilong stretim kitsen, ol tim i baim ol nupela sospen bilong kuk na ol samting bilong kuk long kitsen.

Ol woklain i kisim tupela wiken taim bilong ol long klinim, penim na putim simen long liklik rot bilong wokabaut ausait long Haus Ruth.

BSP Boroko i wokim wok long sanapim nupela wara



L-R Pasto Ronald Brown katim ribon bilong nupela was masin na stov bilong Haus Ruth, na POM Brens Menesa Diana Guria (long hansut) wantaim ol wokmeri bilong Haus Ruth na BSP.

tenk ausait na wanpela wara pam long Siti Misin kompaun long Koki na tu ol i baim ol kain kain sit bilong ol kumu samting bilong salim i go long Mirigeda Fam.

Ol tim bilong BSP i baim na givim wanpela nupela masin bilong wasim klos long kisim mani, wantaim wanpela 6 bena ges stov, na tupela frisa bilong kamapim mani long Haus Ruth.

"Mipela bilip dispela kontribusen bai helpim ol long senisim laip bilong ol pipel long komyuniti bilong yumi wantaim ol kain program

olsem," Maureen Wanu, Boroko Brens Menesa i tok.

Sif Eksekutiv Opisa bilong Siti Misin, Pasto Ronald Brown i tok tenkyu long tupela benk brens long helpim dispela ol komyuniti projek.

"Tenkyu BSP long sapot na long gutpela pasin poroman mipela i gat wantaim ol bikpela ogenaesen olsem yupela na ol narapela lain husat i save sapotim wok bilong mipela olgeta yia," Pasto Brown i tok.

"BSP i wok long putim mani long kain kain ol komyuniti projek olsem bi-

long helt, edukesen na spot long komyuniti. Wantaim dispela pasin Poroman wantaim Siti Misin na Haus Ruth, BSP inap long helpim long senisim laip bilong wan wan ol meri wantaim hevi we i save go insait long Haus Ruth na ol yangpela man husat i save go insait long Siti Misin long 2016," Brens Menesa bilong Pot Mosbi, Diana Guria i tok.

Long 2015, BSP Brens na Statejik Bisnis Yunit i bin wokim 39 gutpela komyuniti projek insait long kantri.

Bikpela bung bilong Luteran Sios long PNG i kamap nau

DISPELA wiken Sarere bai lukim stat long bikpela sinod o bung bilong Ewanjelikel Luteran Sios long PNG (ELC-PNG) long Morobe provins.

Sinod bai ran long wanpela wik long Heldsbach long Finsafen Distrik, Morobe provins.

Kian bikpela bung bilong ELC-PNG i save kamap bihain

long tupela yia we ol deleget o sios lida na ol sios memba i save bung lon glasim na skelim, toktok na wokim ol plen long ol bikpela samting insait long sios, komyuniti na kantri.

OL ripot i tok long dispela yia bung, ol i lukluk long moa long 5,000 pipel bai kamap long Heldsbach long 17 ELC-PNG Distrik long kantri.

Wok redi long dispela sinod i bin stat long las yia mun Jun we 8-pela sios seket long Kote Distrik i bung long mekim wok long ples bilong holim sinod olsem ol haus bilong bung, haus slip, ol ges haus na ol arapela samting ol bai yusim long taim bilong sinod.

OL ripot i tok Morobe Provinsel Gavman na ol ara-

pela ogenaisesen na man i putim han wantaim long kamapim K5 milien manimak long ranim dispela sinod.

OL ripot i tok sampela hevi we dispela sinod i bungim long karimaut ol wok redi em long bikpela san we i mekim wara i sot, na ol gaden kaikai i no karim gut.

Vatiken luksave long Palestain stet

VATIKEN em hetkwata bilong Katolik Sios long wol, i luksave nau long Palestain insait long Midel Is, olsem wanpela stet.

OL ripot i tok dispela luksave i bin kamap taim wol i krugutim nupela yia 20216, bihain long luksave namel long Vatiken na Palestain ol i bin sainim wanpela agrimen long mun Jun las yia.

Vatiken i bin sainim namba wan triti o agrimen wantaim "Palestain Stet" long las yia Jun taim em i singaut long Is-

rael na Palestain long pinisim pait namel long ol, na sapotim tupela stet o kantri (Israel na Palestain) olsem rot long pinisim dispela hevi na pait i stap namel long tupela kantri long planti yia tru.

OL ripot i tok I ripot i tok ong yia 2012, Yunaitet Nesens Jenerel Asembli i bin givim luksave long Palestain olsem obseva non memba stet long Yunaitet Nesen.

Long mun Oktoba 2014, Sweden i bin givim luksave

long Palestain olsem wanpela kantri, tasol Israel i no bin wanbel long dispela na wok pren namel long ol (Sweden na Israel) i no bin go gutpela.

Israel tu i bin tok dispela hap luksave we Vatiken i bin givim i go long Palestain long 2012 i no gutpela bikos em inap kamapim hevi long go het bilong pis agrimen na tu, bagarapim wok pren namel long Vatiken na Israel long bihain taim.

Tasol Holy See aninit long lidasip bilong Pop Francis i laik

gat moa wok long sait bilong wok pren namel long ol kantri long Midel Is we nau, planti Kristen i wok long bungim hevi na ronawe bikos long woa o pait long Syria, Iraq na ol arapela kantri moa long rijon.

OL ripot i tok dispela agrimen i luksave long ol bikpela samting insait long laip na wok bilong sios long Palestain na long wankain taim tu, tokaut long sapotim ol toktok na wok long pinisim woa long rijon long gutpela rot.



Nupela Asembli Helt Seketeri, Roman Pembli (namel) i go pas long brukim graun seremoni we Bisop Reveren Wari Eho (raithan) na PGR Projek Opisa na pastaim PNG diplomet, David Oaseoka i lukluk i stap (lephan).

Nupela hetkwata bilong Yunaitet Sios Galp rijon

Dennis Orere i raitim

MALALAU long Mailovera Yunaitet Seket long Galp provins bai kamap olsem rijonal hetkwata bilong nupela Papua Galp (PGR) hetkwata.

Dispela i kamap bikos long hevi bilong graun na ol i surukim hetkwata long Kerema

taun i kam long Malalaua, klostu long Malalaua Hai skul long Hiritani Haiwe.

OL i bin brukim graun long dispela projek long mun Mas las yia, na wantaim mani helpim bilong Sios Patnasip Program (CPP) i kam aninit long Yunaitet Sios Developmen Yunit, ol i bildim tupela

nupela haus bilong ol Sios Helt na Edukesen seketerilong kamapim gut ol helt na edukesen bilding long PGR.

OL papagraun i bin givim graun i go long PGR long brukim graun seremoni we i bin lukim ol pipel i amamas tru na krai wantaim.

Stat yet long PGR i kamap

wanpela rijon yet bihain em i lusim Westen rijon, em i no save gat wanpela pemenen hetkwata bilong em inap nau.

Nau PGR i wanpela rijon em yet na i kamap hap bilong 11-pela Yunaitet Sios long PNG rijon we ol bisop na ol rijonal seketeri i go pas long ol.



BARUNI I GAT CHAPEL NAU!

Em i olsem wanpela driman i kamap klia nau. Klostu 40 krismas, ol Katolik manmeri bilong Baruni, Koukou, Tatana na Kanudi i no gat wanpela haus lotu. Namba wan santu Misa ol i bin selebretim long nambis bilong Baruni. Bihain ol i wokim santu Misa aninit long diwai. Sampela yia bihain ol i muv i go long Tatana. Tasol ol i no stap longpela taim long Tatana. Ol i go bek long Baruni na yusim wanpela klasrum bilong komyuniti skul long Baruni. Bihain ol i muv gen na wokim lotu aninit long diwai gen namel long ples bilong Baruni.

Long wanpela Sande, ol i wokim Misa i stap aninit long wanpela diwai. Bikpela ren i pundaun. Long dispela taim, Mother Teresa bilong Kalkata i bin stap wantaim ol long santu Misa. Wanpela famili i pilim sori na oferim ol Katolik long wokim lotu aninit long haus bilong ol.

Stat long namba tu Sande bilong mun Desemba 1983, ol i wokim namba wan santu Misa aninit long haus bilong Mr. Edward Corlett. Pater Paul LanglangMSC i bin wokim Misa. Inap long 32 Krismas olgeta ol i bin yusim haus bilong Edward Corlett long wokim santu Misa olgeta Sande na long ol bikpela de.

Long namba foa Sande bilong mun Desemba 2015, Pater Paul Liwun SVD i bin wokim las Misa aninit long haus bilong Edward Corlett. I gat bikpela selebresen long tok tenkyu long Edward na famili bilong ol. Em i tu bikpela Pestode bilong Santu Famili bilong Nasaret, olsem na ol i wokim bikpela lotu tru. Bihain long lotu ol i givim bikpela amamas long Mista Edward Corlett na famili wantaim bikpela kaikai, planti presen na singsing na danis wantaim.

Long namba wan Sande bilong mun Januəri (3 Januəri 2016), Katolik manmeri bilong Baruni, Tatana, Koukou, Kanudi na Kade i wokim namba wan santu Misa long nupela liklik haus lotu bilong ol (Chapel) i stap long las ples bilong Baruni.

Long tok i go pas long santu Misa, Pater Paul Liwun, Peris pris i welkamim olgeta na i tok: "Yumi Katolik manmeri bilong dispela komyuniti, i bin wokabaut longpela taim olsem ol Israel i bin lusim Isip na i go long promis len. Yumi bin wokabaut wantaim...planti i dai pinis, na planti i kamap lapun na planti pikinini na yangpela i kamap. Tude, olsem manmeri bilong Israel yumi kamap long promis len bilong yumi. Yumi kamap long ples we yumi laik wokim haus lotu bilong yumi na stap oltaim long dispela ples wantaim God."

Mi bin tokim ol manmeri olsem; "Dispela haus lotu em liklik tumas. Yumi nidim bikpela haus lotu. Bikos, tude mi lukim planti manmeri i no save kam lotu antap long haus bilong Mr. Edward, i kam bek na joinim yumi gen. Olsem na yumi mas taitim bun long stretim pepa bilong graun na taitim bun long wokim fanreising (Fund raising) painim mani long wokim bikpela haus lotu bilong yumi."

I no gat spesel selebresen long statim Misa long nupela haus lotu/Chapel. Bikos wok bilong chapel i no pinis yet. Mipela plen long wokim bikpela de bilong opim na blesim em long de 1 bilong Me 2016, taim mipela i selebretim Pestode bilong Santu Josep Wokman, em i petron santu bilong Catholic Church Baruni.

Wanpela meri, i no save kam misa bipo antap long haus bilong Edward i tokim mi bihain long Santu Misa: "Nau bai mi kam olgeta Sande, bikos yumi i gat haus lotu pinis, Bipo yumi go lotu long Sande tasol i olsem yumi go bihainim santu Misa bilong famili. Nau em i trupela haus bilong God."

Nau mi lukim olsem kros bilong mi long Ista 2015 (Lukim stori Tasol no.219), karim kaikai nau. Tenkyu God long helpim na kamapim wok bung wantaim long Baruni.



KOMENTRI

Kamapim lo bilong strongim disaplin insait long polis fos

Planti promis i kamp long maus bilong ol lida long rausim ol nogut pasin long kantri long dispela yia, 2016.

Ol lida i mekim ol dispela promislong Nu Yia toktok bilong ol. Praim Minista yet i mekim sam-pela strongpela toktok.

Em i givim tok lukaut i go long ol polis olsem i no gat spes bilong ol polis husati brukim lo. Em i tok husat polisman o meri i mekim nabaut long ol pablik, bai i aut long wok.

Praim Minista i tok long taim palamen i bung gen long mun Mas, bai gavmanikamapim wan-pela lobilong lukautim disiplin bilong ol polis.

Watpo na Prai Minista yet i mekim dispela strongpela tok lukaut? As bilong en i stap long planti bikpela asua ol polis i bin mekim long ol pipel long 2015 na long ol arapela yia i go pinis. Ol i kilim man, paitim na bagarapim nating pipel, na kamapim ol pasin we i brukim lo bilong kantri.

Dispela kain bikhet pasin bilong sampela polis opisa i givim bikpela nem nogut tru long ol polis.

Na em i bringim bikpela sem long gutpela nem bilong Royal Papua Niugini Konstabuleri (RPNGC). Wok bilong ol polis em long lukautim ol pipel bilong kantri. Ol i promis long mekim wok bilong lukautim lo na oda na laip bilong ol pipel. Ol i pren bilong ol pipel. Tasol hia long PNG, planti taim



yumi lukim olsem ol polis i kamap birua bilong ol pipel.

Dispela pasin nogut bilong ol polis i mekim na planti pipel i no gat moa bilip long gutpela wok bi-

long ol polis. Ol pret bikos ol polis i kamap olsem ol birua gen bilong pipel.

Yumi i go insait nau long 2016, na i gat planti ol bikpela intene-

senel bung bai kamap long PNG long 2017 na 2018. Dispela em i wanpela as we Praim Minista i laik stopim dispela bikhet pasin bilong ol polisman.

I gutpela long Praim Minista yet i opim maus na toktok long stopim ol polis i brukim lo bilong kantri.

Yumi sapatim dispela toktok bilong em na yumi wet nau long lukim wanem kain lo bai kamap long palamen. Sapos lo i kamap tru, orait bai em i wok olsem wanem.

Na husat bai go pas long mekim ol wok painimaut long kotim husat polisman o meri i brukim lo?

I mas gat gutpela sistem i kamap long mekim dispela lo i wok tru na ol pipel i ken bilip gen long wok bilong ol polis.

I gat planti ol wok painimaut i wok long kamap yet long ol trabel ol polisman i kamapim.

Sampela i save winim sampela yia bipo long ol i kamap long kot.

Sampela i save dai long rot bikos ol ripot i no redi o ol polis i trensfe long narapela provins na i no gat narapela opisa inap long skruim ol wok.

Planti ol kain samting olsem i save kamap na stopim ol wok bilong kotim husat polis i brukim lo.

Long ol keis bilong polis i sutim man i dai, planti famili stap yet wantaim wari bikos ol i no lukim wanpela mekimsave long polis husat i kamapim dispela hevi.

Yumi amamas long dispela promis bilong Praim Minista long stretim polis fos. Na olsem wanem long ol soldia bilong PNGDF?

Ol tu i gat bikpela askim long sampela trabel i bin kamap we laip bilong man na ol propeti i bagarap long han bilong ol soldia. Bai gavman i wokim wanem long ol tu o nogat? Y

umi save olsem ol ami i gat lo na kot bilong ol yet long stretim ol hevi ol soldia i kamapim. Tasol planti taim ol pablik husat i kisim bagarap long han bilong ol, i no lukim wanpela hanmak bilong tok sori.

Ol i no save sapos ol soldia husat i kamap ol dispela rong i kisim wanpela bikpela mekimsave o nogat.

Olsem na yumi hop long taim gavman i lukluk long ol stretim polis fos, bai em i lukluk tu long stretim disaplin insait long PNGDF.

Tok klia sapos papamama bai baim projek fi

DISPELA i nupela na i stat bilong yia na ol skul pikinini i redi long go bek long skul.

Bipo long ol i go long skul i gat ol askim ol papamama i mas klia long en.

Edukesen Dipatmen i mas tok klia sapos ol bai baim sampela fi o nogat?

Ol fi olsem skul fi na projek fi.

Ol i save em i Gavman polisi pinis long pikinini i no ken baim skul fi na projek fi.

Sampela taim long 2013 Gavman i bin kamapim fri edukesen polisi na las yia em i kamapim fri projek fi polisi.

Tasol sampela hevi i pas long dispela tupela polisi.

Gavman na ol manmeri i amamas ol pikinini i go long skul.

Tasol hevi em i no gat inap ol klasrum na ol klasrum i pulap tumas, tisa i no inap long lukautim planti pikinini na ol skul mangi i no lainim



gut ol samting.

Narapela em long ol skul i no gat inap mani long kamapim ol wok bilong ol.

Bikos long dispela, ol i harim Vais Minista bilong Edukesen i tok Gavman i tingting long kamapim gen projek fi polisi. Em i mekim klia dispela toktok taim em i kamap long greduesen bilong Laloki Teknikel Skul au-sait long Pot Mosbi.

Sapos em i tru Gavman bai

lusim dispela polisi long dispela yia em i mas tok klia long disisen bilong em bipo long skul i stat gen..

Dispela long wanem ol i no laik long Gavman i senis i go kam long ol disisen bilong em we wanpela yia em i tok long baim na narapela yia em i tok nogat.

Moa yet, ol i no laik long las minit senis na ol hatwok i pas long dispela disisen olsem painim mani long baim fi bilong ol pikinini.

Taim kain tok save i kamap bihainim tru, planti papamama i no inap long painim mani hariap long baim ol fi na i no inap long salim pikinini i go long skul.

Na dispela i pasim na mekim nogut long rait bilong pikinini long em i mas go long skul long kisim save.

Papamama i amamas long Gavman i kamapim fri edukesen polisi long wanem

dispela i lukim planti pikinini i go long skul na dispela inapim rait bilong ol long kisim save.

Taim polisi bilong fri edukesen i go gut i gat hevi i pas long projek we wan wan skul i save sasim pikinini long baim.

Dispela mani em wan wan ol skul i save kisim long kamapim ol wok insait long hap bilong ol yet.

Mani bilong fri edukesen polisi i no karamapim wok wan wan skul i mas mekim. Nogat.

Na mani bilong projek fi Gavman i no bin lusim i go. Dispela i lukim planti skul i bungim hevi long kamapim ol wok insait long hap bilong ol. Na planti bilong ol i laik pas.

Nau em taim Edukesen Dipatmen mas tok klia sapos ol papamama bai baim projek fi o nogat!



Published Weekly, Thursday, for Word Publishing Company, Ltd.
P.O. Box 1982, Boroko, NCD
Papua New Guinea
Telephone: (675) 325 2500
Fax: (675) 325 2579
Email: editorial@wantok.com.pg
Websait: www.wantokniuspepa.com
Pe bilong wanpela yia, 52 niuspepa

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager
Elizabeth Konga

Editor
Veronica Hatutasi

Published at Able Building Complex, Sec 58 Lot 02, Waigani Drive.

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.



Wantok tim salim Nu Yia griting i go long olgeta femili na ridas bilong **Wantok Niuspepa!**



Elizabeth Konga - General Manager
Hepi Nu Yia long olgeta pren, binis pren, *Wantok* rida, kastoma, klient, wanwok na famili. Tenk yu long sapot blong yupela na lukim yupela long neks yia.



Lessley Bents - Adv & Marketing Mng
Hepi Nu Yia i go long femili, pikinini na ol Bubu long Lae na Hagen. Yia 2015 i go nau, 2016 bai karim planti blessing i kam taim yumi lusim long han bilong God tasol. God Bless!



Veronica Hatutasi - Editor
YUMI kam gen long dispela spesel taim bilong yia we yumi tingim ol famili, ol pren, ol wanwok na ol klaien Bikpela tok tenyu i go long ol gutpela *Wantok* rida, ol kolumnis na ol stringa bilong mipela long ol provins. Ol famili long Atonomas Rijon bilong Bogenvil na Mosbi. Nu Yia i go long yupela olgeta!



Jada Wilson - Head of Design Cartoonist
Oloman! Nu Yia pinis ah!! Hepi Niu Yia long olgeta femili hia long Pom, Wewak, Maprik na Rigo/Gabagaba!! Senisim pasin long yia 2016



Buana Ragela - Office Manageress
Hepi Niu Yia i go long ol femli bilong mi na ol wokmanmeri bilong Word Publishing. Tenkyu long papa God long lukautim yumi dispela yia.



Frieda Kana - Senior Reporter
Mi tok tenkyu long God na salim tok amamas bilong Nu Yia, i go long ol famili bilong mi, ol wanwok long midia, na namba wan tru em ol rida bilong *Wantok niuspepa!* God Bless!



Nicky Bernard - Photographer
Tenkyu tru long wok bung wantaim long dispela yia. Amamas long wok bung wantaim long 2016. Hepi Nu Yia long yupela ol famili, rida na ol klaien. Huro!



Aja Potabe - Reporter
Mi laik tok tenkyu long olgeta midia konteks bilong mi long bisnis, politiks, na jeneral nius we mi save wokbung wantaim ol. Mi laik wokbung gen wantaim yupela long yia 2016. Hepi Nu Yia!



Esther Wani - Reporter
Hepi NU YIA long yupela olgeta! Mi laik tok tenkyu long rida, ol wantok bilong mi, ol wok kontek bilong mi. Spesol wan long ol famili bilong mi long Pom, Kimbe na Hagen.



Philemon Tame - Reporter
Hepi Nu yia long ol ridas na femili hia long PNG! Plis amamas wantaim belisi na God Bless!



Tapua Ekari - Advertising Sales Coodinator
Mi laik tok tenkyu long ol klaients bilong mi na femili long Hula na Lese Kavora long Galp provins. Hepi Nu Yia!



Augustine Unido Senior Sales Rep
Tenkyu long olgeta klaien bilong mi long mekim 2015 i kam gut. Lukluk long 2016 long wok bung gen long mekim wankain. Meri Krismas na Hepi Niu Yia!!



Steven Farapo - Sales rep
I would like to wish my Client, Families and Friends a Prosperous 2016 New Year. I' am looking forward to working closely with all in the 2016 New Year.



Sandra Amuru - Admin
Meri Krismas na Hepi Niu yia long ol ridas na femili hia long PNG! Plis amamas wantaim belisi na God Bless!



Sari Eovo - Circulation Supervisor
Mi wishim olgeta klaients long olgeta hap bilong PNG na tu femili bilong mi bikpela Meri Krismas na Hepi Niu Yia. Amamas wantaim belisi!!



Symond Porwol
Graffix & Website

Mi laik salim Nu Yia griting i go long ol famili na poro bilong mi husat i stap long Polen. Mi laik salim tu i go tu long ol lain SVD long PNG na ol wanwok long *Wantok*. Mi bilip long pikinini Jesus bai i kam insait long laip bilong yumi olgeta na Em bai i senisim olgeta samting i no stap gut tumas, na karim hop na laikim long laip bilong yumi.

Bro Szymon Porwol, SVD

**YUMI WOK BUNG GEN
DISPELA YIA 2016 NA MEKIM
KAMAP GUTPELA TRU WANTAIM BLESSING BILONG PAPA GOD!
YUMI PUTIM PAPA GOD
NAMBA WAN LONG OLGETA SAMTING YUMI MEKIM.
GOD BLESS!!**



Tupex Jerry Admin & Courier
Hepi Niu yia i go long ol *Wantok* ridas hia long PNG. Spesel wan igo long ol sios memba na femili bilong mi. Tingim Jisas long dispela nupela yia!

Krismas na Nu Yia amamas



*Ol krismas pren
presen...*



*...na ol
Nu Yia pati
animols!*



Planti kain amamas i save kamap long Krismas na Nu Yia. Planti famili save laik go long ples long amamasim Krismas na Nu Yia wantaim ol klen na haus lain bilong ol. Ol ples lain tu save gat kain kain amamas bilong ol long Krismas na Nu Yia. Sapos yu stap long siti na go long ples bai yu amamas long stail bilong ol ples lain long Krismas na Nu Yia. Krismas na Nu Yia long bikpela siti Mosbi i save senis sampela taim. Nau yet i no gat planti manmeri na pikinini long Mosbi long Krismas na Nu Yia, olgeta i go amamas long provins na ples bilong ol. Yumi bai wet long Januери pinis na bai Mosbi pulap gen long kain kain pes. Lukim sampela poto bilong Krismas na Nu Yia insait long Mosbi siti. *Ol poto na Stori Nicky Bernard*

LAMANA HOTEL KAMAPIM LAS PAIA WOKS

Stori bilong tumbuna

Rot we Saa Kbleku wanpisin i kamap

BIPO, bipo tru, tumbuna bilong Saa Kbleku traib long Gumini Distrik, Simbu Provins, i kam aut long Kup. Tupela poroman em Kumai na Kungom i stap. Tupela i stap wantaim, skelim kaikai, helpim narapela na ol i stap gut.

Wanpela taim, Kungo i kilim walabi na i no givim long Kumai. Olsem na Kumai i wari na tokim ol lain bilong em long rausim Kungom.

Ol i kam raunim Kungom na em i ranawe i go long bus. Sampel i sore long Kungom na go wantaim. Sampela i brukim wara Maril na go long Mui Kone. Sampela i bihainim rot go long Kelau. Em ol Saa Kubleku husat i stap long Sait bilong Nomane.

Are Babia wantaim ol meri pikinini bilong em i stap yet long Mui Kone.

Wanpela taim, tupela lapun manmeri i wokabout i go na ol pikinini bilong Arre Babia i lap long baksait.

Tupela lapun i sem na ol i go longwe. Lapun man i tokim lapun meri, purpur bilong yu em orait, lukim as tanget bilong mi. Lapun meri i tok yu tu em i orait.

Tupela i go bek long haus na tokim ol pikinini bilong ol long rausim Arre Babia famili.

Moning taim ol papa graun i kam raunim ol Arre Babia famili. Arre Babia famili i ranawe i go long maunten na go long bikpela bus namel long Karamui na Gumnine. Ol i go stap long Bomai kantri sait.

Wanpela taim, Arre Babia i painim wel abus i go long hapsait bilong wara.

Em i raunim wanpela walabi na walabi i ran i go na kam bek long sem hap, na em i kilim.

Bihain em i lukim olsem dispela hap em i gutpela ples.

Narapela de, em i kam na wokim gaden long ples ol i kolim olong Mui Kone.

Em i kamapim bikpela populesen. Namba wan pikinini em Sai Kuikane, namba tu em Sa Tobeku, namba tri em Saa Baimin Gaulin na namba foa em Arre Baa.

Nau yet, namba bilong ol pipel i gro na kamap planti tru.

Foapela wod kaunsel nau i stap long Saa Kaleku (S-K) traib na mipela nau i stap olsem 6-pela o 7-pela jeneresen.

**Samuel Gore
Simbu**

TOKSAVE:

WANTOK i askim ol gutpela rida bilong em long salim ol tumbuna stori i kam na bai mipela i putim long niuspepa. Sapos stori bilong yu i gutpela na mipela i putim long niuspepa, bai yu winim **K50** we mipela bai salim i go long akaun bilong yu, o salim mobail unit inap long **K50** i kam long fon bilong yu. Salim nem, edres na mobail namba bilong yu wantaim stori i kam long dispela edres: *Stori Tumbuna, Wantok Niuspepa, C/-Word Publishing Company, P O Box 1982, BOROKO, NCD, PNG o email edres: editorial@wantok.com.pg Telepon namba: 3252500.* Tenkyu



Ol las paia woks i pairap antap long nupela bilding bilong Fainens na Treseri long Waigani. Long sait bilong dispela bilding em maunten Lamana Hotel save yusim long pairapim paia woks long sampela yia i go pinis. *Poto Nicky Bernard.*

Nicky Bernard i raitim

NUPELA Yia planti lain save amamas long welkamim long planti kain wei, maski yu stap long ples, taun o siti, i gat wei long yu amamasim nupela yia.

Long ol bikpela taun insait long kantri tu, ol gat wei long welkamaim nupela yia long mekim ol manmeri na pikinini i amamasim nupela yia.

Long Pot Mosbi planti ol famili save kisim kar o wokabout go klostu long wanpela bikpela Hotel Lamana na wetim long lukim ol paia woks ol i save kamapim.

Dispela paia woks long Lamana Hotel i save kamap planti yia i go pinis na dispela paia woks bilong em i bikpela moa long ol narapela kain paia woks.

Olgeta yia ol manmeri na pikinini long Mosbi save go sanap long sait bilong rot na lukim dispela ol stail na naispela paia woks Lamana i save kamapim.

Long 2014 sampela ol nupela na longpela bilding i kamap long ples we Lamana Hotel save paiaim ol paia woks, dispela i mekim Jenerel Menesa bilong Lamana, Yiannis Nicolaou i go askim ol Fainens na Treseri

Dipatmen long ol ken yusim nupela bilding bilong ol long paiaim paia woks long 2014 na nupela yia 2015.

Long Oktoba na Novemba dispela nupela bilding bilong ol fainens na Treseri i pinis na ol wok manmeri bilong Fainens na Treseri i muv go insait, dispela i mekim hat long Lamana Hotel i pairapim gen paia woks long mauten klostu long ol. Yian-nis gen askim ol long pairapim paia woks antap long nupela bilding bilong ol.



Ol bikman bilong Fainens na Treseri i tok orait tasol tokim Lamana Hotel tu long

laspela taim ol bai yusim bilding bilong ol long pairapim paia woks.


Yiannis wantaim ol tim bilong em long Lamana Hotel i save pairapim paia woks fri long ol kastoma bilong ol na ol pablik manmeri na pikinini bilong Pot Mosbi long sampela yia nau long mekim ol manmeri bilong Mosbi siti i welkamim nupela yia.

Jenerel Menesa bilong Lamana Hotel Yiannis Nicolaou, em wanpela man tasol long PNG i save man bilong pairapim ol paia woks na Lamana Hotel tasol i save long kisim ol paia woks kam autsait long ol ovasis kantri.


Em nau! Ol pikinini i ken painim rot i go long ples wantaim Wantok kru...



EM ORAIT



EM NOGUT



Ol wod lista hia:

- ATUN
- AMBRELA
- AIPAS
- BAUSA
- BIKOS
- BREK
- DIWAI
- DEVELOPMEN
- GELPREN
- GRINPELA
- HATPELA
- HOLIM
- HOLIDE
- KANAKA
- KAVING
- KOTKOT
- LUKLUK
- MASIN
- MELEK
- MULI
- NAMBA
- NILIM
- NOGUT
- OVAIM
- OLSEM

Y P A P N V E F I S F P H L I H E O X O
 F E F Q T J F I N O E S D E R G L G E X
 F R T H U F O I F P M L Y D A S I J S A
 E L E S S H E I R O B K B E I L T J S T
 A R X A A O R R W E N O I F P G B H I U
 A S E Z E D H X R D O T K W A R A L I N
 N S I U C S I Z R H G K O W S Y U O Y H
 M B I Q Q E D W C O U O S K N M S B E N
 M J E X I I Y P A L T T D A A C A Z D A
 V E T E H E O T K I T K A V I N G A B T
 S I F R C O M U K M H A T P E L A M O T
 U G T I F O L N N V A M B R E L A K N I
 Q I Q H S G D I V E L O P M E N L Y A F
 E N R Y Q Q S Q D S M L V P E I B D M L
 N A K P Q A W I U E E K N A K L R O Z S
 H L S I M O O I S G A I T G I I E E R C
 F A Y U P D E L I S R S H J W M K K D L
 S R J K E R O R B G Q N S C A R E G P C
 L E S A A E G X E P V T P S P F D Z X L
 H N S I A T U S R Q S C A G U M X P C Y



Bai yumi no inap dai moa

Maunten paia long Manam na wesana i pundaun long olgeta hap. Planti tru i pundaun tu long gras kantri long Angoram distrik.

Olgeta sak sak kanu i pulap long wesana. Moning tru ol meri long ples ol i bung na stori long wanem samting i kamap.

Taim Kanage i harim olsem em i tokim meri bilong em. Em nau ples nogut bilong ol sin man i paia pinis long hel. Nau yumi lukim das bilong ol bun bilong ol i kam long yumi.

Dai man i pundaun kam daun na wasim yumi.

Bai yumi no inap dai moa na tu bai nogat las de moa. Bai yumi stap long ples long de taim tasol na wetim ol man i dai bipo bai tromoi tin pis na rais kamdaun long yumi olsem dispela wesana i pundaun nau ya.

Taim ol meri harim ol kon stori bilong em, ol i kalap kalap na paitim han na ol i singaut, "Hepi gut de Kanage. Wis yu ol the bes. Lip fo eva mo. Hel i pinis na heven i kamap."

Carl Lenua
Samban base

Posin man

Kanage i mekim haus bilong em long maunten ol i kolim 'Mosou De Tohu Via.'

Na em i gat tupela rum. Wanpela bilong sindaun na skelim ol meri i go na narapela em bilong slip.

Wanpela taim long bik nait stret, Kanage i pilim hot na i laik go kisim kol win long nambis. Em i kirap katim i go daun long solwara na em i lukim wanpela man i toilet i stap na em i katim long sait i go.

Long ples i bin gat tok win olsem ol posin man i save raun long bik bus long biknait.

Taim man i lukim Kanage, em i ting olsem em i posin man na em i singaut antap stret. Kanage i harim man i singaut na em tu i ting olsem em i wanpela posin man. Man, Kanage i no isi long ran. Em i ran siksti na go hait long haus lotu.

Kanage nau i tingim olsem man i wok long toilet i stap. Em i no save olsem man i go kisim ol man meri long painim dispela posin man na mekim save long en, Kanage tasol.


Taim em i lukim ol manmeri i kam long haus lotu em i save olsem ol i mas ting olsem em i posin man.

Hariap tru em i laitim ol kendel na sindaun i go daun long fom na giaman beten i stap. Taim ol i kam long haus lotu ol paul sapos em tasol o narapela man. Kanage i lukim ol na pret olsem nogut ol i paitim em.

Ol i tok olsem nogut posin man em i Kanage na em i kirap na tokim ol olsem, "Yupela luksave long man na toktok tu o nogat. Taim man i sindaun na beten i stap em i bikpela tambu tru long toktok o askim long wanpela samting"

Samting tru em i pret long ol i paitim em na em i giaman tokim ol olsem em i kam long haus lotu long beten.

Ansa bilong Wod Pilai isu 2155





TOK PISIN NEWS

from Radio Australia

radioaustralia.net.au

Harim TOK PISIN long
Radio Australia
101.9FM
Port Moresby

Tok Pisin Service

6am - 7am 6080; 7240(KHZ)

7pm - 9pm 5995; 6020; 9710; 1280(KHZ)

Rausim 15 edvaisa bilong Australia

Ol i rausim 15-pela edvaisa bilong Australia i wok long ol gavman dipatmen.

PNG gavman i no lus tingting long promis em i bin mekim na rausim moa long 12-pela ovasis edvaisa bhusat i save wok wantaim ol gavman dipatmen.

Dipatmen bilong Foren Afeas bilong Australia i tok em i tru olsem PNG gavman i rausim 15-pela edvaisa i save wok wantaim Fainens, Trensport, Treseri, Jastis na Ateni Jenerel Dipatmen long taim yia 2015 i bin pinis long Desemba 31.

Tasol em i tok narapela 18-pela pablik sevan bilong Australia i stap na wok yet olsem ol edvaisa.

Paul Barker bilong National Institute ov Public Affairs i tok Prait Minista, Peter O'Neill, i bin wokim dispela toktok long rausim ol ovasis edvaisa i wok long ol gavman dipatmen long las yia Julai.

Ol kalabus Vanuatu MP bai no kisim rifan

TENPELA long ol pastaim Palamen Memba long Vanuatu husat i bin go long kalabus las yia long pasin bilong paulim na kisim gris mani i aplai long sanap na resis long ileksen bai kamap long dispela mun.

Ol i bin pinisim Palamen na tokaut long holim nupela ileksen bihain long ol i bin kalabusim 14 Palamen Memba long mun Oktoba las yia, na ol i lusim ol sia bilong ol.

Ilektorel edvaisa, Martin Tete, i tok ol i kisim moa long 10-pela applikesen long ol foma MP i stap long kalabus, tasol ol i rausim pinis 9-pela nem long lista.

Ol Ilektorel opisa i bin tingting long autim fainel lista bilong ol kendidet long apinun bilong dispela wik Tunde na kempein i ken stat, tasol dispela samting i wokim na ol i surukim i kam long tude Fonde.

Mista Tete i tok ol i wok long glasim planti handed ol kendidet long rausim ol dispela husat i no inap sanap long resis bihainim lo bilong Vanuatu.

Stap wanpis i birua long helt bilong ol yangpela, stadi i tok

NUPELKA risets we Yunivesiti bilong North Carolina (UNC) i kamapim i painim olsem pasin bilong ol yangpela pipel i stap wanpis na i no gat poroman i no gutpela na i ken bagarapim helt bikos long no gat inap eksasais.

Ol bikpela toktok:

- Ol bikpela samting long ol yangpela long developim ol sosel skil, risets i painim.

- Link namel long pasin bilong no gat pren na i no miks wantaim ol narapela

TV Drama pilai siris bilong Japan kamap nau long EMTV

EMBASI bilong Japanlong PNG i amamas long tokaut olsem EMTV nau i soim Televisen drama siris bilong Japan ol i kolim long "Carnation" insait long wanpela wok-bung wantaim Japan Foundation na NHK (Japan Broadcasting Corporation).

Carnation em i soim stori bilong wanpela strongpela meri Japan nem bilong em Itoko na famili bilong em.

Nem bilong Itoko i bin kamap bikpela long fasen bisnis long stat bilong 20 senseri, na tripela pikinini meri bilong em long kamap olsem biknem long fasen bisnisolsem ol fasen disaina long intanesenel level.

Maski taim we Itoko i stap i no gutpela tumas na planti hevi i kamap, Itoko i save stap amamas na i strong long bihainim ol driman bilong em.

Namba wan hap bilong dispela pilai drama i bin kamap long EMTV long dispela wik Tunde, Januəri 05 we i soim drama ol i kamapim long Osaka Prefecture, em bikpela komesel rijon long Westen Japan.

Yu ken bihainim na lukim dispela pilai drama siris long tupela wik bihain long Januəri 19, 2016.

Soim long TV long PNG wanpela pilai drama siris em i nupela na bikpela samting insait long histori na wok poroman namel long Japan na PNG.

Embasi bilong Japan i bilip dispela pilai drama siris bai mekim ol pipel bilong PNG i klia moa long naispela samting na tu, ol salens long kalsa na laipstail bilong Japan we bai promotim gutpela wok pren na poroman namel long tupela kantri.



na helt bai go het long laip.

- Krismas namel long 18 na 50 em kwaliti rilesensip i save kamap we i impoten moa long hamas pren ol i gat.

Planti stadi i kamap pinis we i soim ol hevi long sait bilong helt we pasin bilong stap wanpis na i no gat pren o miks wantaim ol narapela i kamapim long ol bikpela manmeri, tasol dispela em i namba wan taim ol i kamap wantaim kain risets long ol yangpela pipel.

Ol risets lain long UNC i tok wok painim bilong ol i soim olsem bikpela samting em long strongim ol yangpela pipel long bildim o strongim ol sosel skil olsem tasol long tokim ol long kaikai gut na long wokim eksasais.

Taim yu stap wanpis, na yu no miks o bung wantaim ol narapela pipel, em i no gutpela na bodi bilong yu bai pilim ol hevi we yumi save bungim long olgeta de.

Profesa Kathleen Mullan Harris, bilong UNC i tok dispela risets i bin lukluk

long konekdsen namel long ol yangpela i stap long dispela kain stap na ol famili bilong ol, ol pren, skul na ol neiba.

Profesa Harris, a em i wanpela profesa long sosiolojilong UNC, i tok ol dispela i no gat ol pren na i no save miks wantaim ol narapela i stap long birua bilong kamap patpela na kisim sik long bel na sik long bel no gut.

As tingting we mipela i bin makim long mekim ol wok risets long dispela ol helt isu em bikos dispela i ken kamapim bikpela sik bihain long laip. Em ol kain sik olsem hat disis o sik long lewa, stroke kensa na i no gat inap gutpela binatang long pait egensim ol sik, Profesa Harris i tok.

Ol liklik Pasifik Ailan kantri i bungim hevi bihain long US i stopim pising dil

OL gavman bilong ol liklik Pasifik Ailan

kantri olsem Tuvalu na Tokelau i wok long bungim hevi we ol i lusim bikpela mani i go insait long kantri bilong ol bihain long Amerika i stopim dil em i bin sainim wantaim ol long baim moa long 6000 de bilong painim pis long 2016.

Long mun Ogas las yia, Amerika i bin tok orait long peim moa long \$US 68 milien i go long ol Pasifik Ailan kantrisapos ol i painim pis long 6250 delong 2016.

Tasol tripela mun bihain, US pising bisnis i tok em bai no inapim namba wan kwatali peimen.

Ol kantri ya i no kisim ol peimen yet na nau, Pacific Forum Fisheries Agency (FFA)na ol narapela i wok hat long kamap wantaim ol sampela rot long daunim dispela hevi.

Deputi Dairekta Jenerel bilong FFA's, Wez Norris, i tok dispela dil we i feil o i no wok inap long kamapim bikpela bagarap long baset bilong ol liklik Pasifik ailan kantri.

Gan kontrol: Barack Obama i toktok wantaim atoni-jeneral long nupela rot



Long Nu Yia toktok bilong en Presiden Obama i tok save long ol plen bilong gan em ol lain Repabliken i bin egensim. Poto: AFP long ABC Nius

US Presiden Barack Obama I tok nupela eksekutiv eksen bilong em long strongim rul bilong baim gan i "stap insait" long pawa bilong em na i orait aninit long lo bilong US long rait bilong ol pipel long karim gan. Dispela em i toklukaut long husat lain i tingting long salensim em long kot.

- Ol bikpela poin:
- Mista Obama i abrusim Congress wantaim ol dispela nupela plen, bai kamapim bikpela salens bikos em i tok ol i mas sekap long bekgraun bilong man bipo em i baim gan.
 - Em i toktok wantaim atoni-jeneral bipo long em i tokaut long plen bilong gan kontrol.
 - "Dispela pasin i kalapim lo bilong wok bilong eksekutiv, na kantri bai i no inap wanbel," Ripabliken Spika i tok.
- Mista Obama i tokim ol nius ripota olsem gavman bilong em bai tokaut long ol nupela ol dispela nupela rot klostu.

Drag geng i kilim meya bilong Meksiko Gisela Mota, sampela de bihain long em i kisim wok

OL gavman opisa bilong Meksiko i tok ol i bilip wanpela drag geng ol i kolim Los Rojos i bin go pas long ol lain husat i kilim meya, wanpela de bihain long em i kisim wok.

- Ol i tok
- Sampela lain i bin yusim gan long sutim Gisela Mota, 33 krismas, long haus bilong em, wanpela de tasol bihain long em i kisim wok bilong Meyabilong Temiksko.
 - Ol polis i kilim tupela saspekna arestim tripela moabihain tasol long ol i sutim em i dai.
 - Ms Mota i bin sapotimolplenn bilong rausim pawa bilong ol lokal polis.
 - Insait long las 10-pela yia, ol lain i bin kamapim birua pasin long 100 meya long Meksiko.

Indai bilong Gisela Mota, 33, i mekim kantri i kirap nogut na wari tru, na i soim ples kliapasin bilong vailens long sentral Morelos na bikpela salensol meya long Meksiko i save bungim long wok bilong ol.

Dispela pastaim memba bilong Kongresi dai long haus bilong em bihain long ol i sutim em, 24 aua tasol bihain long em i kamap Meya bilong Temiksko, samting olsem 90 kilomita saut long Meksiko Siti.

Mota i bin wanpela bilong ol politisen husat i sapotimtingting bilong Gavana Graco Ramirez long rausim



Nupela meya, Gisela Mota i toktok bihain long ol i mekim em i kamap meya long Temiksko, Morelos stet, Meksiko long Januari 1, 2016. (AFP: Miguel Rojas) Poto AFP/ABC.

pawa long han bilong ol lokal polis. "Ol wok painimauti soim olsem dispela kriminal grup Los Rojos i bin kilim Gisela Mota," Gavana Graco Ramirez i raitim long Twitter. Em i tok amamas long Ms Mota na tok em i wanpela gutpela pren i gat gutpela sans long politiks na bai ol i painim ol dispela lain husat i kilim em na givim bikpela mekimsave long ol.

Kempen bilong klinim ol strit i no ran gut

WANPELA Twitter kempen i askim ol pipel bilong Britens long klinim ol strit bipo long 90 krismas bilong Queen Elizabeth i no kamap gut bikos ol pablik i tok ol ogenaia i laik yusim ol pipel olsem ol wokman nating. Dispela #Cleanforthe-Queen kempen em Country

Life megasin wantaim Keep Britain Tidy i go pas long en, na Adrian Evans, husat i bin lukautim selebresen bilong Diamond Jubili bilong Kwin long 2012. Dispela grup i tok ol i "kempen long klinim Briten bipo long ol selebresen i kamap long mun Jun. Ol i askim ol pipel long UK long

bung wantaim na givim wanpela presen i go long Kwin we bai helpim tu ol-geta pipel. "Bipo long betde bilong Kwin 21 Epril 2016, mipela i laik kirapim tingting bilong milien pipel long kam bung wantaim long sampela aua na rausim ol pipia long mekim ples i luk nais moa." Tasol dispela aidia i no

kamap gut. Ol pipel i salim kain kain ol tok nogut na tok bilas i go bek long ol lain i kamapim dispela kempen. Sampela i sutim tok long kempen i laik mekim ol pipel i wok nating na i no inap long kisim pe. Tasol sampela i wari na askim watpo ol pipel i belhat nating long dispela kempen bilong klinim kantri.

Strongpela guria kamapim birua long saut Asia



Strongpela guria inap long mak bilong 6.8 I kamap long Saut Asia, na kilim nainpela pipel na klostu 200 i kisim bagarap. Wok bilong helpim ol lain i stap aninit long ol haus i slo daun bikos no gat pawa saplai na telekomyunikesen.

- Ol ripot i tok:
- Guria i kamap 29 kilomita west long Imphal, India na i stap 55 kilomita insait long graun, USGS i tok.
 - Ol 6-pela pipel i dai long Imphal, India, 3-pela i dai long hat atek long Banglades.
 - Samting olsem 200 pipel i kisim bagarap na sampela haus i bagarap, namel long ol em ol haus sik, ol polis i tok.
- US Geological Survey (USGS) i tok guria i stat long 4:35am (lokal taim), 29 kilomita west long Imphal siti long India. Em i kapitel bilong Manipur stet klostu long boda bilong Myanmar na Banglades.
- Ripot i tok guria i stap 55 kilomita insait long graun na pas-taim ol i tok dispela gura i kamap insait long Myanmar we strong bilong en i stap long mak bilong 6.8.
- Dispela guria i kamap long taim ol pipel i slip na ol ruf na lata bilong haus i bruk nabaut long dispela siti we 270,000 i save stap.

Man Huli long Amerika

Wanpela potograpa bilong Frans Marc Dozier i kisim sampela naispela piksa we i soim bikman bilong ol Huli, Sif Mundiya Kepanga long sampela bikpela siti long Amerika. Mista Dozier i bin bungim Kepanga samting olsem 15 yia i go pinis long taim em i bin kam raun long PNG na sif Kepanga i bin raun wantaim em. Ol tupela i save salim pas i go kam na long 2014 ol i bung gen long taim Mista Kepanga i raun wantaim grup bilong PNG Turis promosen i go long US. "Mipela i olsem ol turis nating. Tasol Mundiya i no wanpela nomal turis bikos em i narakain, em i bilong wanpela traib olsem na em i lukim ol samting long narapela kain wei," Mista



Dozier i tokim Pacific Beat. "Ol i stap bek long US inap long tripela mun long kisim pototo bilong raun bilong sif Kepanga long ol ples long US. "Mi na Mundiya i lukluk long mipela yet na tok, yumi stap long Nu Yok. Ating yumi mas stap na raun long Amerika na kisim ol pototo," em i tok.

Kroton Ekwiti kamap olsem wanem

Aja Potabe i raitim

K2.97 BILIEN (US\$1.01b) em i bikpela mani tru na i luk olsem ol papagraun bilong PNG LNG Projek bai kisim hat taim long painim dispela mani long baim 4.27 pesen Kroton Ekwiti long PNG LNG Projek.

Kumul Petroleum Holdings Limited (KPHL) i holim dispela 4.27 pesen intres o ekwiti bilong ol papagraun na 4-pela provinsal gavman.

Dispela 4.27 pesen i stap insait long 16.57 ekwiti KPHL i holim long PNG LNG Projek. Mani mak bilong dispela 4.27 pesen em i sanap olsem K2.97 bilien.

Sapos ol papagraun na 4-pela provinsal gavman bilong Sauten Hailans, Westen, Galp na Sentral i givim dispela K2.97 bilien long KPHL, ol bai baim 25.75 pesen sea bilong KPHL na dispela bai mekim ol i kamap 4.27 pesen seaholda long PNG LNG Projek.

Maski 75 pesen ges bilong PNG LNG Projek i kam long Hides na Angore long Hela, Hela Provinsal gavman i no bin stap bikos Hela i no bin kamap provins yet taim ol i bin sainim agrimen long kirapim PNG LNG Projek long yia 2009.

Hela bai kisim benefit aninit long Sauten Hailans Provisal gavman.

Tasol ol papagraun na provinsal gavman i no gat dispela mani. Sapos ol i bin kisim royalti mani bilong LNG, ol inap long gat dispela kain mani long inapim ol long baim dispela Kroton Ekwiti.

Tasol olgeta royalti mani bilong PNG PNG Projek papagraun i stap insait long wanpela tras akaun long Benk ov PNG (BPNG/Sentral Benk).

Praim Minista Peter O'Neill i bin tok ol dispela royalti mani bilong ol papagraun i stap gut wantaim BPNG.

"No gat wanpela man bai tatsim dispela ol royalti mani bilong yupela. Olgeta mani bilong yupela i stap gut insait long wanpela tras akaun long Sentral Benk," Mista O'Neill i bin tokim ol papagraun long Hela taim em i bin go long Tari las yia.

Dispela wik, KPHL i bin bungim ol papagraun long Pot Mosbi long stretim toktok long larim ol papagraun i baim dispela Kroton Ekwiti.

Pastaim memba bilong Koroba-Lake Kapiago, John Keken, i tok ol papagraun i no gat K2.97 bilien long baim dispela 4.27 pesen Kroton Ekwiti.

Mista Keken i askim KPHL na nesanel gavman long helpim ol papagraun na 5-pela provinsal gavman long kisim dispela mani.

Oposisen Lida Don Polye i tok ol papagraun na provinsal gavman i mas wokbung wantaim long kamap dispela K2.97 bilien.

"Mi bai askim ol papagraun na 5-pela provinsal gavman long wokbung wantaim na painim dispela



Hela Gavana Anderson Agiru i mas luksave long Klos 24 bilong UBSA agrimen.

mani," Mista Polye i tok.

Menesing Dairekta bilong KPHL, Wapua Sonk, i tok KPHL i redi long helpim ol papagraun i painim dispela mani.

Mista Sonk i wok long bungim ol lenona lida long Pot Mosbi long stretim toktok na kamapim wanpela disisen long helpim ol i painim dispela mani na baim ekwiti sea long KPHL.

Papagraun na provinsal gavman

Ambrela Benefit Sering Agrimen (UBSA) we ol papagraun, provinsal gavman, nesanel gavman na projek divelopa i bin sainim long Kokopo, Is Nu Briten long yia 2009, i bin wanbel long larim ol papagraun na 4-pela provinsal i baim 4.27 pesen ekwiti long PNG LNG Projek.

Sauten Hailans, Westen, Galp na Sentral provinsal gavman i bin sainim dispela agrimen na agrimen i luksave long ol olsem LNG impekted provins. Ol i gat rait aninit long UBSA agrimen long baim dispela Kroton Ekwiti.

Tasol Hela Provins i no bin kamap long yia 2009. Hela i kamap provins long yia 2012. Klos 24 bilong UBSA agrimen i tok Hela na Sauten Hailans provinsal gavman i mas sainim wanpela agrimen long katim na skelim ol benefit bilong PNG LNG Projek.

Dispela Kroton Ekwiti em i wanpela benefit we Hela bai kisim. Maski 75 pesen bilong ges bilong PNG LNG Projek i kam long Hela, Hela provinsal gavman i no sainim dispela agrimen long skelim benefit namel wantaim Sauten Hailans.

Ol papagraun grup we UBSA i luksave long ol na givim tok orait long ol i baim dispela Kroton Ekwiti em ol papagraun bilong: Petroleum Developmen Laisens (PDL) 1 (Hides) projek eria, PDL 7 (Hides 4) projek eria, PDL 2 (Kutubu), PDL 5 (Sentral Moran), PDL 6 (Not West Moran), PDL 4 (Gobe), PDL 9 (Juha), PDL 8 (Angore), LNG Paipain projek eria, na LNG Plent projek eria.

Kroton Ekwiti

Planti ol manmeri na sampela ol

papagraun tu i save paul long Kroton Ekwiti.

Taim ol papagraun, provinsal gavman, nesanel gavman na projek divelopa bilong PNG LNG Projek i bin sainim UBSA agrimen, nesanel gavman i bin tok orait long larim ol papagraun na 4-pela provinsal gavman bilong ol dispela projek eria i baim 4.27 pesen ekwiti bilong Kroton Namba 2 kampani.

Gavman aninit long Indipenden Pablik Bisnis Kopresen (IPBC) i bin kirapim dispela kampani, Kroton Namba 2, olsem wanpela sabsideri kampani bilong IPBC na makim em i kamap olsem Stet nomini long PNG LNG Projek.

Kroton Namba 2 i holim 16.57 pesen sea o intres long PNG LNG Projek. Kroton Namba 2 i holim dispela intres o ekwiti bilong gavman.

Tasol gavman i bin wanbel long UBSA agrimen long givim 4.27 pesen i go long ol dispela papagraun na provinsal gavman insait long 5-pela provins.

Na mani mak bilong dispela 4.27 pesen em i K2.97 bilien. Ol papagraun na provinsal gavman i mas baim dispela 4.27 pesen bilong Kroton Namba 2 long kamap seaholda bilong dispela kampani.

Kroton senisim nem

Planti senis i kamap bihain long UBSA. Ol dispela senis i lukim ol nem bilong kampani i senis. Dispela nem Kroton Namba 2 i senis pinis.

Taim PNG LNG Projek i laik kamap, gavman i bin kamapim dispela kampani, Kroton Namba 2 Limited.

Gavman i bin makim Kroton Namba 2 i kamap Stet nomini o kampani makim maus bilong PNG Gavman long kamap wanpela join vensa ekwiti patna long kirapim PNG LNG Projek.

Dispela taim, Kroton Namba 2 i bin stap olsem wanpela liklik (sabsideri) kampani bilong IPBC. IPBC em i bikpela mama kampani bilong PNG Gavman.

Kroton Namba 2 i bin senisim nem bilong en i go long Nesanel

Petroleum Kampani (NPCP) long yia 2013.

Long yia 2015, gavman i kamapim nupela lo long senisim straksa bilong NPCP na senisim kampani nem NPCP i kamap Kumul Petroleum Holdings Limited (KPHL).

Long yia 2015, gavman i senisim nem bilong IPBC tu i go long Kumul Konsolideted Holdings Limited (KCHL)

Dispela 16.57 pesen ekwiti intres bilong gavman aninit long Kroton Namba 2 nau i stap wantaim KPHL.

Tasol KPHL i no moa stap aninit long KCHL (pastaim IPBC). Dispela senis bilong kampani straksa i mekim KPHL i stap long em yet tasol em i kampani bilong gavman na em i holim nau dispela 16.57 pesen intres bilong gavman long PNG LNG Projek.

Ol projek eria papagraun na provinsal gavman i laik baim dispela 4.27 pesen i stap insait long dispela 16.57 pesen we KPHL i holim i stap.

Glasim gut papagraun

I gat planti grup bilong ol papagraun i stap. Sampela ol man i papagraun tru bilong ol wan wan projek eria.

Aninit long Oil na Gas Act 1998, ol man i ken tok ol i papagraun tru sapos kampani i sanapim ol wel rik long hap graun bilong ol, wel het i stap long kaukau gaden bilong ol, paipain i ran long bus bilong ol, o sampela samting bilong ges o wel projek i kamap long bus, graun na wara bilong ol.

I gat sampela ol giaman papagraun na ol stilman tu i stap. Dispela ol stilman o ol 'pepa lenona' i bin stilim planti ol bisnis developmen gren (BDG), infrastraksa divelopmen gren (IDG), hai impek projek fan, MOA fan, Ministerial Komitmen na ol arapela mani we ol papagraun tru inap long kisim.

Long stopim ol dispela kain 'pepa lenona', Dipatmen ov Petroleum na Eneji (DPE) i kamapim klen veting proses (CVP) long glasim gut ol papagraun tru.

Dispela i wok long kamap yet. Taim CVP i pinis, ol papagraun tru we DPE i glasim gut tru, painimaut na luksave aninit long CVP bai

kisim ol royalti mani bilong ol we i nau stap wantaim Sentral Benk.

Nesanel Kot jas Jastis Ambeng Kandakasi tu i bin wok long helpim ol papagraun long Hela i glasim gut wanem lenona grup i tru tru papagraun bikos planti lenona grup na manmeri i wok long tok ol tu i papagraun.

Ol dispela papagraun i bai kamap seaholda bilong KPHL taim ol baim dispela 4.27 Kroton Ekwiti.

Royalti na Ekwiti mani

Ol papagraun i no kisim ol royalti mani maski PNG LNG Projek i salim pinis moa long 150 LNG kago long Saina, Japan na Taiwan.

Winmani PNG gavman inap long kisim long PNG LNG Projek, aninit long dispela 16.57 pesen sea KPHL i holim long nem bilong gavman, i no kam insait long kantri long stretpela rot.

Mista Sonk i bin tok KPHL i bin mekim sampela winmani taim projek i salim LNG kago.

Tasol Mista Sonk i no tokaut long hamas stret KPHL i kisim. Praim Minista Peter O'Neill i no tokaut stret long hamas mani KPHL i kisim olsem winmani bilong LNG Projek. Oposisen Lida Don Polye i tok dispela winmani i no kam insait yet long kantri na i no stap long kantri.

Mista Polye i tok em i painimaut olsem mani bilong ol papagraun na pipel bilong PNG i no stap long Sentral Benk.

Tasol BPNG Gavana Loi Bakani i bin tok Sentral Benk i gat tras kaun long holim ol royalti mani bilong ol papagraun tasol.

Mista Bakani i tok ol papagraun bilong PNG LNG Projek bai kisim ol royalti mani bilong ol taim gavman i pinisim ol CVP wok.

Praim Minista Peter O'Neill i tokim ol papagraun pinis olsem ol royalti mani bilong ol long PNG LNG Projek i stap gut tru long wanpela tras akaun long Sentral Benk.

Fainens Minista James Marape tu i bin tok ol royalti mani na sampela ol Infrastraksa Developmen Gren (IDG) na MoA fan mani bilong gavman na papagraun wantaim i stap long Sentral Benk.

Tasol Mista Polye i tok LNG mani i no kam insait yet long kantri na tu mani i no stap insait long Sentral Benk.

"Dispela mani i stap long tras akaun long Sentral Benk em i mani we mi bin stap Tresera na putim long givim long ol papagraun olsem IDG na MoA fan mani," Mista Polye i tok.

Em i tok LNG mani PNG inap long kisim i nau wok long go insait long wanpela eskro (escrow) benk akaun bilong invesmen benk Yunion Benk ov Suisalen (UBS) long Singapo.

Sapos ol papagraun i kisim dispela ol royalti mani, ol bai inap long baim dispela 4.27 Kroton Ekwiti, Mista Polye i tok.

Em i tok sapos nogat, em i tok ol papagraun bai painim sampela dinau mani ausait na baim dispela Kroton Ekwiti.

PNG bisnis ekspo bai kamap long Jayapura

MINISTA bilong Tred, Komes na Industri, Richard Maru, bai kisim wanpela bikpela PNG bisnis delegesen i go long Jayapura, Indonesia long dispela mun.

Dispela bisnis delegesen bai go long mekim wanpela bikpela bisnis ekspo we ol kampani na bisnis manmeri bilong PNG na Indonesia bai kam bung long promotim bisnis, tred na invesmen namel long tupela kantri.

Wanpela as bilong dispela bung em long promotim nupela Kagamuga intenesenel ples balus long Mt Hagen, we dispela ples balus bai lukim ol dairek intenesenel flait i go kam long Jayapura.

Tasol Mista Maru i no tokaut long wanem taim stret dispela bisnis ekspo bai kamap.

Long Desemba las yia, Mista Maru i tokim ol nius manmeri olsem bikpela grup tru bai go long Jayapura long mun Januari dispela yia.

"Mi bai kisim bikpela grup bilong ol bisnis manmeri, ol maus manmeri bilong ol kampani bilong PNG na ol nius manmeri i go long dis-



Tred, Komes na Industri Minista, Richard Maru.

pela bisnis ekspo,"Mista Maru i tok.

Em i tok tingting bilong kirapim dispela bisnis ekspo long Jayapura i bin kamap bihain long em i bin kisim wanpela bikpela bisnis

delegesen i go long Honiara, Solomon Ailan long yia 2014.

"Dispela PNG bisnis ekspo long Honiara i karim gutpela kaikai. Planti ol kampani bilong PNG i inves nau long Solomon Ailan na dispela i

apim level bilong tred na invesmen bilong PNG long Solomon Ailan,"em i tok.

Mista Maru i bilip olsem dispela bisnis ekspo long Jayapura tu bai karim gutpela kaikai long bihain taim bikos PNG na Indonesia i bin wanbel long kirapim moa bisnis namel long tupela kantri.

Taim Presiden bilong Indonesia Joko Widodo i bin kam raun long PNG las yia, em i bin sainim wanpela agrimen long larim PNG na Indonesia i kirapim bisnis na invesmen.

Praim Minista Peter O'Neill i bin tok gavman i redi long mekim bisnis wantaim Indonesia na helpim ol kampani na bisnis manmeri bilong tupela kantri long mekim bisnis.

Aninit long wanpela agrimen PNG Gavman i bin sainim wantaim Indonesia long yia 2013 long Jakarta, PNG bai no inap long rausim takis mani long ol kampani bilong Indonesia i stap long PNG.

Indonesia bai no inap rausim takis mani bilong ol PNG kampani husat i mekim bisnis long Indonesia.

Australia no givim sans long Manus

MEMBA bilong Manus, Ronnie Knight, i tok gavman bilong Australia i no givim sans long ol manmeri Manus long mekim bisnis.

Mista Knight i tok Australia i wok long kisim ol Australia kampani i kam insait long Manus na givim kontrak long ol Australian kampani long givim ol sevis long Manus rijonal prosesing senta.

Em i tok Australia i wok long kisim i ol kaikai olsem kakaruk, mit, rais, flawa na arapela samting.

"Mipela i gat ol samting we ol asailum sika bai nidim. Ol manmeri bilong Manus i salim ol kakaruk, ol pis, ol mit, kiau bilong kakaruk na ol arapela kaikai,"Mista Knight i tok.

Em i tok dispela pasin bilong Australia i no stret bikos em i no givim sans long ol manmeri bilong Manus long mekim bisnis.

"Australia i mas givim sans long ol kampani bilong Manus o kampani bilong PNG long kisim sampela ol kontrak bilong Rijonal Prosesing Senta,"Mista Knight i tok.

Em i tok taim ol kampani bilong Australia i kam mekim bisnis long Manus, ol bai no inap baim takis i go long Intenal Revenu Komisin (IRC).

Mista Knight i tok ol kampani bilong Australia i save saplaim kaikai long Rijonal Prosesing Senta na mekim ol arapela liklik wok we kampani bilong PNG inap long mekim.

Tasol Gavman bilong Australia i tok em i wok long sapotim ol manmeri bilong Manus long mekim bisnis na kirapim ikonomi bilong Manus na PNG.

Manus i go het niusleta bilong Australian Hai Komisin i tok; "Long yia 2014 na 2015, Australia i sapotim 200 manmeri bilong Manus long kirapim ol tingting bilong mekim bisnis."

Australian Hai Komisin i bin kamapim dispela long wanpela bisnis woksop, niusleta i tok.

"Rijonal Prosesing Senta i kirapim 1,000 nupela wok mani na 70 pesen bilong ikonomi bilong Manus i gro go antap taim ol konstraksen wok i kamap.

"Ol manmeri bilong Manus i kisim ol arapela spin-of benefit taim 33 bisnis haus bilong ol asples manmeri i kisim ol kontrak wok na givim sevis long Rijonal Prosesing Senta na dispela i makim olsem K2.1million i kapsait long ikonomi bilong Manus long olgeta wik,"Manus i go het i tok.

PNG Air kisim narapela ATR balus

Aja Potabe i raitim

BALUS kampani PNG Air i baim narapela ATR balus long Desemba las yia.

Sif Komesal Opisa bilong PNG Air, Paul Abbot, i tok namba tu ATR balus bilong PNG Air i kam insait pinis long kantri long Desemba las yia.

Dispela i mekim PNG Air i gat tupela nupela ATR 72-600 balus. Dispela tupela balus i sevim ol pasindia o ol kastoma long PNG.

Mista Abbot i tok ol i kisim dispela balus i kam long ples Toulouse long kantri Frans.

"Narapela nupela ATR balus bilong PNG Air i kam insait pinis long kantri. Tupela pilot bilong PNG Air, Kepten McCullum na Kepten Chris Avenell wantaim arapela flait kru bilong PNG Air i kisim dispela nupela balus i kam long Toulouse, Frans,"Mista Abbot i tok.

Long Mande Januari 4, dispela namba tu ATR balus (P2-ATA) i joinim namba wan ATR balus (P2-

ATR) na stat long ranim pasindia long ol ples balus we PNG Air i save sevim.

Taim ol i kisim dispela balus i kam insait long kantri, ol i larim ol ensinia bilong balus i sekim gut ol samting bilong balus, Mista Abbot i tok.

Em i tok dispela balus i mekim pinis sampela ol tes flait na nau em i wok long ranim ol komesal flait.

"PNG Air i amamas long kisim dispela nupela balus. Dispela bai helpim ol kastoma bilong mipela

long yusim dispela nupela balus we i gat gutpela sefti stendet,"Mista Abbot i tok.

Em i tok PNG Air i tingting long opim sampela nupela balus rot long yia 2016. Em i tok dispela bai larim planti manmeri long kisim gutpela ea sevis.

CEO bilong PNG Air, Muralee Siva i tok, PNG Air bai gat ol ATR balus tasol bikos ol i wok long isi isi tasol rausim ol arapela Dash 8 balus.

"Mipela i wok long isi isi rausim ol olupela balus na bai kisim ol nu-

pela ATR balus tasol. Las wik PNG Air i baim namba tu ATR balus gen na nau ol ensinia na pilot i wok long testim dispela nupela balus,"Mista Siva i tok.

Insait long yia 2016, Mista Siva i tok ol bai baim narapela 3-pela moa ATR balus. Long mun Desemba 2016, PNG Air bai gat 5-pela ATR balus, em i tok.

Praim Minista Peter O'Neill i bin amamas stret taim ol bin senisim nem bilong kampani na baim dispela nupela ATR balus.



Port Moresby to Port Vila

Our schedule Pt Moresby-Pt Vila | Pt Vila-Pt Moresby
WED 1000HRS | THU 0800HRS

Air Niugini connecting Melanesia.

Call Toll Free on 180 3444 or contact your nearest Air Niugini Travel Centre or Travel Agent for further details.

Air Niugini
www.airniugini.com.pg

Trukai Industri stap strong wantaim PNG

TRUKAI Industri i kisim 45 yia eniveseri bilong em insait long Papua Niugini long strongim faundesen bilong em wantaim moa helpim i go long ol komyuniti wok na ol lokal invesmen.

Trukai i bin stap long kantri winim ol yia bilong PNG i stap indipenden, na em i stap strong yet olsem wanpela kampani we i save salim rais em ol Papua Niugini i save laikim tru i kam inap long 2015.

Long yia 2015,

Egrikalsa Minista, Tommy Tomscoll i givim tok stia long ol rais kampani long ol i mas stat long putim mani i go long helpim ol lokal fama na Trukai i soim komitmen bilong em taim em i tokaut long ol plen bilong em long kamapim rais industri long rurel Papua Niugini.

Visen bilong ol long Sentral Provins i kamaples klia taim Amadi-Baga Integreted Len Grup i givim 20 hekta graun long ol i kamapim

rais fam insait long Kairuku-Hiri Distrik. Bihain long dispela ol i wok hat yet inap long 8-pela mun long kamapim pilot projek bilong rais stat wantaim wok bilong katim bus na redim graun bilong planti rais i go long taim bilong kisim ol rais bilong kaikai.

“Taim mipela i helpim long kamapim mani insait long rurel sekta em mipela i gat bikpela amamas. Dispela nupela sapta long histori bilong mipela em i gat

bikpela lukluk bilong Trukai olsem wanpela ogenaisesen, na long mekim projek i go bikpela long longpela taim bihain,” Trukai Industri Sif Eksekutiv Opisa, Greg Worthington-Eyre i tok.

Egrikalsa bai stap namba wan yet long tingting bilong Trukai Industri insait long yia 2016, wantiam wok bilong en long strongim ol rais fama long ol narapela provins olsem Wes Nu Briten na Oro.



2015 Trukai Krismas donesen long ‘Life PNG Care’ long Gerehu.

Tok-lukaut long strongpela win na solwara bagarap

James G. Kila i raitim

MADANG Provinsal Disasta Opisa i givim bikpela tok-lukaut i go long ol liklik bot i save ron namel long bikples Madang na ol ailan long bihainim gut ol sefti lo na was gut long ol yet.

Ekting Asisten Dairekta bilong Madang Provinsal Disasta Opisa, Rudolf Mongalee i mekim dispela tok lukaut i go long pablik long Madang bihain long strongpela win na tait bilong solwara i sakim wanpela bot longwe tru long not kos wantaim ol sumatin bilong Karkar Sekenderi skul na ol papamama bilong ol long Desemba.

Mista Mongalee i tok dispela bot wantaim ol sumatin bilong Karkar sekenderi wantaim ol papamama bilong ol i bin kisim bikpela taim tru long solwara namel long Karkar ailan na Kubugam long bikples, we ol bai go sua na kisim PMV bas long go long taun. Strongpela win na tait bilong solwara i sakim na pulim ol i go olgeta long Tokain viles we em samting olsem 15 kilomita longwe long ples ol i laik go sua long en.

Mista Mongalee i tok tu olsem bihain long longpela taim bilong san na drai-sisen, Nesenel Weda Sevis i tokaut tu bai i gat taim bilong bikpela ren na tait-wara na strongpela win, we em sampela sain bilong El Nina weda.

Em i mekim strongpela toktok i go long ol lain moto-bot opereta bilong Karkar, Manam, Long ailan na Boisa ailan long bihainim sefti lo na noken pulumapim tumas pasindia long moto-bot bilong ol na ron katim solwara.

Mista Mongalee i mekim bikpela tok-lukaut tu i go long ol papa bilong ol liklik moto-bot o dingi we i save ron namel long Madang na Karkar ailan na Raikos olsem ol i mas karim ol sefti samting antap bot olsem moa disel, ol sefti plastic, ol rop na tu wara kontena na kenvas na ol arapela sefti ikwipmen.

Em i tok nau yet planti lain i laik go long ples long ailan na amamasim Krismas na Nu Yia wantaim ol femili bilong ol na bai yusim ol moto-bot na liklik sip long go long ol ailan.

Tasol bikpela samting em sefti bilong ol manmeri em bikpela samting. Olsem na ol papa bilong ol moto-bot i mas redim ol sefti samting antap bot na ol skipa bilong bot na kru i mas toksave gut long ol pasindia.

Mista Mongalee i tok sapos strongpela win na solwara i bagarap olgeta moto-bot na liklik sip mas no ken ron.

Kisar Mill trening fama kisim trening

Stori na poto - Samuel Toposona

OL lokal fama long Markham distrik, Morobe Provins bai i no moa wokabout go longwe long klinim rais bilong ol bikos Nesenel Egrikalsa Risets Institut (NARI) i bringim wanpela han masin bilong rais pinis long ples bilong ol.

NARI i bin bringim dispela masin long Kisar, aninit long Fam Mekenaisesen yunit bilong ol. Wanpela meri rais fama Doris Awian i tok olsem Kisar rais mil trening i kamap long rait taim long ol fama long Markham bikos ol i bin traimit hat long kisim ol rais bilong ol i go long ol narapela rais masin klostu long ol na ol i save tromoi bikpela mani tumas.

Bihain long trening bilong Kisar mill, Winau basket na pinat sela, Doris i tok dispela kain fam trening bai senisim stail bilong ol wok bilong ol fama na bai ol inap long kisim moa mani long ol rais fam bilong ol.

“Tenkyu NARI na ol patna bilong yu long sapatim kain trening program olsem. Nau mipela inap long go bikpela wantaim wok bilong mipela na mipela i ken yusim kisar rais mil long stretim rais bilong mipela long salim,” Doris i tok.

Sung Baiya, wanpela fama bilong Mamaringan viles long Wantoat i tok em i bin les pinis long rais fam tasol taim em i harim long Kisar rais mil long 2008 insait long wanpela NARI Inovesen So, bel bilong



Doris Awian i soim wei bilong winau basket.

em i kirap gen long wokim rais.

Em i tok Kisar em i wanpela gutpela mekenais tul bilong rais fama bilong rurel komyuniti husat i save taitim bun long painim rot bilong milim rais bilong em. Taim em i kam long dispela trening em i lukim planti samting long wei bilong holim kaikai longpela taim bilong ol famili husat i save kaikai rais olgeta taim.

NARI Egrikalsa Sistem Program Dairekta, Dokta Sim Sar i tok Yuropien Yunien Afrika Karibien Pasifik Ailan Faming Mekenaisesen Projek (EUACP) tu i go pas long wok bilong rausim ol pinat sel olsem wanpela tingting bilong yusim

Kisar rais mila long rausim sel bilong pinat tu.

Dokta Sim i tok mekenais masin bilong rurel fama em ol i wokim long kain wei we ol hap, hap bodi bilong em bai isi long painim insait long komyuniti yet na bai ol i no ken tromoi bikpela mani long stretim.

Em i tok olsem wankain trening tu i kamap long ol narapela provins olsem Madang na Isten Hailans provins. Tasol trening long Takom Model Fam i kisim wanpela moa step i go fowod wantaim ol tul bilong ol yet we ol i bringim kam long trenning wantaim.

Ol lain husat i kisim trening

i bin wokim ol Kisar rais mil bilong ol yet wantaim ol Winau basket bilong rausim rais mil long sel bilong ol na long sifting na tromoi i go antap wantaim win olsem dispensa. Ol i wokim tu wanpela kain Kisar rais mil bilong ol yet we bai gat handel bilong han long tanim long milim rais na wanpela fen bilong rausim rais sel na ol sid bilong en.

Dispela Kisar rais mil trening em i wanpela EUACP mekenais projek we ol i ronim long Garam viles insait long Markham distrik na em i wanpela model fam bilong kamapim ol gutpela kain Kakao na Kokonas na ol samting bilong planim ol Kokonas long Morobe provins.

Tupela nupla pilaia bai joinim Gigira Laitepo

GIGIRA Laitepo FC long Telikom Nesenel Soka Lig (NSL) bai lukim tupela nupela pilaia i joinim ol long raun tu bilong dispela semi-profesinel soka kompetisen.

Dispela tupela pilaia em Russell Jofari bilong POM FC na Clement Willis bilong Rapatona. Jofari bai pilai long midfil na Willis bai stap olsem wanpela beks.

Kosa bilong Gigira Laitepo Robert Sabadi i tok dispela tupela pilaia i stat long trening wantaim ol pinis na bai stap insait long skwat bilong ol taim ol i salensim Hekari long Sande long Bisini Soka graun.

Sabadi i tok em i amamas olsem dispela tupela pilaia i kam insait long tim bilong na strongim tim bilong ol.

Dispela senis em i kamap long wanem NSL em i gat polisi ol i kolim long trense windua we ol pilaia husat i pilai long wanpela tim long raun wan i ken kalap i go long namba tu raun.

Dispela trense windua bai pas long Fraide bipo long ol pilai i kamap long Sarere.

Ol arapela klap long NSL tu bai lukim sampela nupela pilaia i joinim ol na sampela ol tim bai lusim sampela ol gutpela pilaia bilong ol.

Gigira Laitepo i sindaun long namba foa ples long NSL Sauten Konrens leta wantaim wanpela win, tupela lus na tupela dro.

Sabadi i tok moa yet na i tok olsem olgeta pilaia bilong ol i stap long gutpela mak na nogat wanpela bilong ol i kisim bagarap long krismas taim.

Gigira gat tupela laspela trening bilong ol long Sarere bipo long gem bilong ol long Sanden a Sabadi i tok olsem sapos ol i win or dro wantaim Hekari bai gutpela stret long ol.

Em i tok olsem ol i bin skoa egensim Hekari long raun wan na dispela em i bin gutpela long ol bikos nogat narapela tim i bin skoa egensim ol Hekari long raun wan.

Ol pilaia bilong Gigira i bilong olgeta foapela rijon long kantri na Kumul Petroleum em wanpela kampani husat i bin soim sapot bilong en ong ol long sampela wik i go pinis wantaim mani mak bilong K500 000.

RAGBI pilai bilong All Blacks, Jonah Lomu, i bruk taim em i dai long las mun

Dispela nius i kam isi taim ol i bin kamapim tras fan bilong tupela pikinini man bilong em bikos ol poro i wari long famili i no gat inap long helpim ol yet.

Nu Silan Ragbi Pilaia Asosiesen i opim Ligesi Tras bilong Jonah Lomu, long helpim Dhyrelle, i gat 6-pela krisman na Brayley, i gat 5-pela krismas bihain long dai bilong papa bilong tupela.

Sif eksekutiv bilong asosiesen, Rob Nichol, i tok ol i kamapim dispela tras fan bihain long poro bilong ol i painimaut olsem famili i no gat inap mani.

"Dispela i bin kamap bikos pasion bilong Lumbu i gutpela moa we em i save helpim ol nara-pela lain husait i save stap long ol bikipela hevi olsem," Nichol i tok.



Nu Silan Ragbi Pilaia Asosiesen i lonsim Ligesi Tras bilong Jonah Lumbu.



Pranav Dhanawade i daunim 117 yia rekot wantaim bikipela namba bilong ran em i skoaim long inings.

Dhanawade i winim wol rekot, 1, 000 ran long kriket

SKUL boi long Mumbai, Pranav Dhanawade, i kamapim histori taim em i bin kamap namba wan long batsman long olgeta klas long kriket taim em i skoaim 1, 000 ran long singel inings.

Dhanawade i gat 15 yia krismas i bin kamaut long ran bilong em wantaim 1, 009 not long 323 bal na i daunim 117 krismas rekot ol i bin putim wantaim namba bilong ran long wan inings.

Dhanawade em i pikinini man bilong wanpela draiva, i daunim rekot

bilong Arthur Collin, husat i kisim 628 ran long Ingran long yia 1899 long taim bilong inta-skul tonamen i bin kamap long Weten Indian Siti.

"Bikipela samting Pranav Dhanawade i bin mekim long kamap namba wan long skoaim 1, 000 ran long inings. Em i bin wokim gut tru na em mas wok hat moa," Beting legend bilong India, Tendulkar i tok.

Namba wan win bilong Dhanawade i bung wantaim 129 foa na 59 siks na i bin kamap long hai straik reit wantaim 312.38.



Lleyton Hewitt i amamasim bikipela namba bilong ol lain long Perth, Australia taim em i bin daunim Jack Sock long Hopman Kap.

Hewitt i daunim Jack Sock long Hopman Kap

LLEYTON Hewitt i amamasim ol lain i stap long Hopma Kap taim em i daunim Jack Sock long Tennis.

Hewitt i soim namba wan paiking kwaliti bilong em na i

daunim USA na givim gol long Australia long Tunde nait long Perth.

Hewitt bai lusim Tennis bihain long sama long Australia, na em i tok em bai misim ol pipel

i save sing aut taim em i save pilai.

"Em i stap long baksait long tingting bilong mi olsem dispela em i las nait pilai long Hopman kap," Hewitt i tok.



Nupela Pawa-sapalai Projek long Danagari Rilokesen eria

RAMU NiCo Menesmen (MCC) Limited i luksave long nid bilong ol papagraun we em bikpela tumas long sapotim gutpela sindaun na helpim laipstail bilong femili na ples we ol i stap long en.

Long Disemba 11, 2015 wanpela seremoni i bin kamap long Danagari rilokesin eria long Ramu veli, we i lukim Ramu NiCo i givim ki bilong pawa-haus i go long ol papagraun long opim nupela pawa-sapalai projek long Danagari.

Dispela pawa saplai bai helpim ol pipel long strongim gutpela sindaun insait long femili bilong ol wanwan.

Pawa saplai projek aninit long memorandum ov agrimen (MoA) em i nowok bilong Ramu NiCo olsem divelopa long kamapim. Em wok we Madang Provinsal Gavman i mas wokim aninit long agrimen long MOA. Tasol Madang provinsal gavman i no wokim, olsem na Ramu NiCo i givim han na sapot i go long ol papagraun long Projek eria bilong en long Danagari Rilokesen eria.

Rejista Main Jeneral Menesa bilong KBKMain, Sarimu Kanu i givim ki bilong pawa-haus i go long meintenens ilektrisen David long soim olsem Kampani i helpim long kamapim wok long helpim ol papagraun insait long Ramu NiCo Projek eria.

Ol lain femili husat i stap insait long 15-pela permanent haus long Danagari bai i amamas tru long kisim nupela pawa-sapalai go long haus bilong ol.

Long taim ol manmeri i bin muv i go long Danagari long stat bilong yia 2012, sampela long ol i bin yusim sola-pawa panel long kisim pawa saplai we Ramu NiCo i bin helpim. Tasol taim namba bilong ol manmeri i go antap strong bilong sola-pawa saplai i wok long go daun pawa tu i no moa go strong maski olsem wok meintenens i wok long kamap planti taim.

Long Jun3, 2015 wanpela agrimen i bin kamap namel long Ramu NiCo (MCC)na Heti Power Kampani long bringim pawa saplai i go long Danagari rilokesin eria..

Insait long dispela agrimen, Ramu NiCo bai baim nupela pawa jenereta, wokim kamap pawa-haus bilong saplaim pawa na tu putim kamap ol pawa-lain aninit long graun na tu putim ol waia kebol i go long wan wan ol haus long Danagari. Em bai putim tu ol proteksen instalesin. Wok bilong Heti Pawa Kampani em long sekim gut wok na sefti bilong wok i kamap long lukim olsem wok i bihainim stret sefti lo na stendet bilong PNG Pawa Limited (PPL).


Vais Presiden bilong Ramu NiCo long KBK Main, Mista Zhao Deqian, ol Deputi Menesa bilong KBK main, Liu Tianhu na Mista Fang Lianjun na ol opisa bilong Ramu NiCo Komyuniti Afes (CA) dipatmen i bin stap long lukim dispela seremoni long Danagari.,

Ol lokal manmeri bilong Danagari i amamas na tok welkam long ol lain menesa bilong Ramu NiCo KBK Main wantaim singsing tumbuna na bilas. Ol i serim tu ol prut olsem painapol na melon long ol lain bilong Ramu NiCo long soim bikpela amamas bilong ol na tok tenkyu long dispela pawa-sapalai projek.

Mista Kanu i tok tenkyu i go long ol papagraun long Danagari long sapot ol i givim long lukim divelopmen bilong dispela pawa-sapalai projek. Em i askim ol long lukautim dispela projek long helpim sindaun bilong femili long gutpela rot na kamapim gutpela laipstail long rurel komyuniti ol i stap long en.

1. Ramu NiCo KBK Main Jeneral Menesa, Mista Sarimu Kanu i givim ki bilong pawa haus long David bilong Heti Power Kampani.

2. Ol menesa bilong KBK Main go lukim nupela pawa haus long Danagari.



Trukai stap namba wan sponsa yet

GUTPELA wok bilong Trukai Industri, i save go abrusim ol rais fam na i go long ol spot pilai graun tu long sapatim bikpela spot bilong PNG, ragbi lig.

Trukai i stat long sponsa bilong wina tim bilong primiasip bilong Not Queensland Cowboys stat long 2009, na em i kamap olsem bikpela sponsa bilong jesi bilong SP PNG Hunters long Februari 2015, na em i helpim tim long pait long kisim Queensland Cup, o Intras Supa Kap.

Ol Hunters i lus long wanpela gem tasol na ol i no go insait long fainel gem insait long namba tu yia bilong ol i stap insait long wanpela bikpela ragbi lig resis bilong Australia.

Planti lain husat i lukim gem bilong Cowboys i pinisim Brisbane Brocos long 2015 na kisim primiasip bilong NRL i lukim dispela grin na yelo kala bilong Trukai logo taim NRL i kamapim nupela histori wantiam wanpela nambawan Gren Fainel gem.

Trukai i gat moa gutpela nius long ol lokal NRL fen, long bringim Provina-Summons NRL Primia tropi i kam long Pot Mosbi long namba wan taim.

Mista Worthington-Eyre i tok em i amamas olsem ol Cowboys inap long brukim win bilong ol wantaim planti fen bilong ol long PNG.

"Patnasip namel long Trukai na Cowboys i helpim long kamapim moa fen bilong tim insait long PNG," em i tok.

"Win bilong ol i kamapim taim bilong selebresen i no bilong Trukai tasol, nogat, em bilong olgeta lain long PNG husat i save bihainim pilai stori bilong dispela tim."

Narapela bikpela samting long 2015 em bikpela Trukai Fan Ran i kamap long mun Julai 2015. Bikpela fanreisa bilong Tim PNG etlit. Fan Ran i bin go pas long Pasifik Gems long Pot Mosbi na 16 senta na ol taun long PNG i bin go insait long dispela Fan Ran we i kamapim K100,000 long

helpim kost bilong Pasifik Gems na Komonwelt Gems long Samoa, long Septemba. Trukai em i namba wan sponsa bilong ol dispela bikpela taim bilong pilai stat yet long 1993 na i kam nau.

Kampani i gat 13 yia patnasip wantaim PNG Weitlifing Federesen na em i strongim gen dispela patnasip long taim bilong 2015 Pasifik Gems wantaim K5,000 amamas mani long olgeta lain husat bai winim gol medal. Wantaim dispela Trukai i bin givimaut K65,000 long ol lain i winim gol medal.

I gat planti moa projek i stap long dispela yia wantaim spot na bisnis na MistaWorthington-Eyre i tok em i gutpela taim bilong kampani i stap insait.

"Mipela i laik lukim 2016 olsem wanpela yia bilong kamapim gutpela samting na long makim kos bilong Trukai long bihain taim." Mista Worthington-Eyre i tok.

Raun 2 bilong NSL bai stat bihain long tupela wik

Philemon Tame i raitim

OL 12 klap long Telikom Nesenel Soka Lig i stap long bikpela trening bihain long tupela wik malolo long pilai namba tu raun bilong resis long dispela wiken.

Ol klap bilong tupela konfrens bai pilai strong bikos dispela bai final sans bilong ol long go insait long top 4 bipo long NSL bai go insait long Nesenel Lig fomat.

Ol top 2 tim bilong wan wan konfrens bai pilai Hom na Awe fomat long painim ol Sempion bilong Lig na ol tim bai stap long top 4 bai go insait long fainal.

Sempion Lae Siti Dwellers na maina premia Hekari Yunaitet FC i stap top long lata long konfrens bilong ol yet long raun namba wan.

Ol i no bin daunim Hekari na i stap pas yet long sauten konfer-

ens wantaim 15 poin bihain long raun wan.

Bihain long Hekari em PKA Rapatona FC i kisim 7-pela poin na Erema Galp FC i kisim wankain poin olsem Rapatona.

Gigira Laitepo i bihainim ol wantaim 5 poin na tupela tim i stap las long lata wantaim wankain poin em Huawei PS Yunaitet FC na FC Pot Mosbi.

Dwellers i stap long 11 poin bihain long ol i winim 3-pela pilai long 5-pela gem long noten konfrens.

Welgris Morobe Yunaitet FC i stap bihain long Dwellers wantaim 10 poin na Madang FC i stap long 8 poin.

Admiralty FC i stap bihain wantaim 7 poin, Besta PNG Yunaitet FC i stap wantaim 6 poin na Goroka Gosiha FC i no kisim wanpela poin yet.

O'Neill Gavman bai sapatim yet ragbi lig

GAVMAN bilong O'Neill bai go het long sapatim Ragbi Lig long Papua Niugini bihain long Oposisen i bin toktok long stopim dispela sapat we gavman i givim.

Minista bilong Spot na Nesenel Iven, Justin Tkatchenko, i bin toktok strong long Oposisen na i tok olsem, Oposisen i no gat gutpela het na i laik stopim ol pilaia bilong nesenel ragbi lig.

Lida bilong Oposisen, Don Polye, i bin toktok long las wik Sarere, olsem ol mani we gavman i save givim long ragbi lig em ol i ken givim i go long ol narapela spot olsem soka, swimming, ragbi yunion na o narapela moa spot eria we ol spot pilaia bilong yumi i pilai gut hia long

PNG na long ol narapela kantri tu.

"Mipela bai no inap go het na westim ol mani bilong ol takisman long dispela spot eria we em i gat liklik spes long pilai na kirapim nem long wol," Polye i tok.

Minista Tkatchenko i bekim toktok bilong em (Polye) long Sande na i tok, "Don Polye i paitim olgeta ragbi lig sapat long pes wantaim toktok bilong em long lusim tingting long ol ragbi lig pilaia bilong yumi.

"Dispela gavman bai no inap long stopim ragbi lig. O'Neill/Dion gavman bai strongim ragbi lig long Papua Niugini

"Wanem kain pipia tingting bilong Polye na em i laik rausim mani we

gavman i save putim bilong sapatim ragbi lig?

Wanpela as tingting long wanem, spot i save safa long taim bilong Somare/Polye gavman em ol mas i no putim mani bilong spot.

"Ragbi lig edministresen bilong kantri bilong yumi i stap long liklik sais taim mipela i kamapim gavman. Mipela i kamapim gen ragbi lig infrastraksa long kantri bilong yumi na sapatim ol liklik lig tu.

"SP Hunters bilong mipela i amamasim kantri bilong yumi long las sisen na nesenel tim bilong yumi bai go het long kamap inap long las sisen."

Minista i tok Oposisen i no lukluk gut long ol nius

hetlain bikos, tru gavman i save givim moa sapat long ol narapela spot.

"Mipela i save givim moa sapat long ol narapela spot olsem soka, kriket, etletiks, swimming na AFL, na mipela i lukim ol risalt.

"Ol pipel bilong kantri bilong yumi i ken isi long skelim gut ol wok bilong tupela gavman.

"Somare na Polye i lus tingting long spot long PNG, na O'Neill Gavman i kamapim spot gen long kantri.

"Gutpela eksampel bilong dispela em Somare na Polye i lus tingting long Pasifik Gems, na Gavman bilong yumi we Peter O'Neill i stap pas i kamaut na i givim nambawan Pasifik Gems long histori."

Wol Sef resis bai pulim ol turis



Piksa i soim olsem wanpela sefing ivent i bin kamap na dispela man i ran long resis. Wankain long dispela ivent bai kamap long Tupira, Madang, long Januari, 2017. Dispela bai makim namba wan taim bilong dispela kain resis bai kamap long PNG. Poto Intanet

WOL Sef resis bai kamap long Papua Niugini long mun Januari long 2017 na bai promotim na pulim ol turis long PNG.

Sefing Asosiesen (SA) bilong PNG na Wol Saf Lig (WSL) i tok orait long surf resis o resis long solwara bai kamap long Tupira, Madang.

Inap long 60 pilaia bai resis long dispela wol ivent wantaim 20 woklain bilong WSL, na ol

lain bilong PNG na Intenesenel Midia.

Presiden bilong SAPNG, Andrew Abel, i tok dispela ivent bai kamap aninit long plen we ol i bin mekim pinis na em bai i gat strongpela intanesenel promosen.

Dispela ivent em ol bai brotkastim laip long ol arapela kantri long wol i ken luksave.

Dispela em i sans we

ol meri tu i ken stap wantaim long strongim rait bilong ol.

Abel i tok moa olsem ivent bai toktok tu long vilens egensim ol meri na ol meri bai resis long sef sempion bilong ol meri, na strongim na sapatim ol toktok bilong SAPNG.

"Dispela ivent bai givim bikpela promosen long olgeta hap long wol na em i bikpela samting

long turisim na maketing sait bilong SAPANG taim mipela i lukluk strong long ol prodak developmen long groim turisim sekta," Abel i tok.

SAPNG bai wok poroman wantaim PNG Turisim Promosen Atoriti, Opis bilong Turisim Arts na Kalsa (OTAC), na Ministri bilong Turisim Arts na Kalsa.

Troy Tomba i bin kamap namba wan faita

Philemon Tame i raitim

MASEL Arts em i wanpela strongpela spot we Troy Tomba i bin pilai. Dispela spot i bungim ol pilai olsem pait namel long tupela lain. Sampela pilai aninit long dispela spot em karate, kik boksen, kongfu na sampela moa.

Tomba em i man Sauten Hailans, na em i bin stap long Lae wantaim ankol bilong em taim em i liklik mangi, bikos tupela papa na mama bilong em i bin dai long yia 1992.

I gat wanpela kungfu klap i bin stap long 3 mail long Lae na em i bin i gat bikpela amamas long trening long dispela klap we em i bin stat trening long yia 1993.

Long wankain yia, kampani we ankol bilong em i bin wok i salim ankol i go wok long Rabaul. Tomba i bin lusim trening bilong em long kongfu na i bin go long Rabaul wantaim ankol bilong em.

Em i go bungim wanpela karate klap, Snow Belt Walters, long Rabaul. Tomba i bin go het na joinim dispela klap, bikos klap i stap klostu long haus na wan strit bilong ol.

"Mi les long stap nating na mi bin joinim dispela karate klap," Tomba i tok.

"Mi gat liklik save tu long dispela masel arts spot bikos mi bin trening long Lae taim mipela i bin stap long Lae."

Tomba i bin stap wantaim dispela klap inap 1994, tasol ol i bin lusim Rabaul na i go long Kimbe long pinis bilong yia 1994 bikos volkeno i bin pairap.

Tomba i tok, "Long yia 1994, volkeno i bin pairap long maunten Tavuvur na gavman i bin stretim rot bilong olgeta lain i bin stap long Rabaul long go long hap bilong ol yet na mi bin lusim trening."

"Trenspot long rot, wara, na long ea i redi na olgeta lain i lusim Rabaul. Ol lain long Mosbi i gol long Mosbi, ol lain long Hagen i go long Hagen, na mi bilong Kimbe na mi bin go long Kimbe," Tomba i tok.

Long yia 1995 inap 1999 Tomba i bin stap wantaim John Ravu, husait i gat wanpela karate klap long Kimbe na em i instrakta long dispela klap.

"Ravu i bin kamap long miks papamama we mama long Manus na papa long Saina, husat i bin trening aninit long haus bilong em," Tomba i tok.

Tomba na tim poro bilong em i bin trening inap yia 2000 na ol i bin makim em long go long Fiji.

Dispela em i namba wan Pasifik



Piksa i soim Troy Tomba, husat i bin pilai long olgeta masel arts spot, na kik boksen em i las spot em i bin pilai na i go pait long Australia long yia 2004 inap 2007.

Sempionsip i bin kamap na 8-pela man faita i bin makim PNG. Ol i bin pilai insait long wanpela wik na Tomba i bin winim wanpela gol medal.

Tomba i tok, "Long go long Fiji em i namba wan taim bilong mi long go aut long kantri na pait, tasol mi bin winim wanpela gol medal long Fiji na dispela medal i stap yet."

Em i bin lusim karate na joinim Kimbe Kik Boksen Klap long yia 2001. Em i bin trening inap 2004

na em i bin pait long Tavor So long Kimbe, na em i namba wan taim bilong em long pait long kik boksen.

Em i bin win long namba wan pait bilong em long kik boksen long dispela taim na ol i makim em presiden bilong Kimbe Kik Boksen Asosiesen Klap.

Tomba i tok, "Mi bin traime pinis ol narapela masel arts spot na dispela em i namba wan taim bilong mi long pait long kik boksen long Tavor So."

"Mi bin winim dispela pait bikos mi gat inap skil na teknik we mi bin daunim birua bilong mi na ol i bin makim mi presiden long Kimbe Kik Boksen klap."

"Long wankain yia, 2004, ol i bin makim mi long go pait long Melbourne, Australia, na mi bin i go pait, tasol mi no winim wanpela medal," Troy i tok.

Long yia 2005, Kimbe Provinsal Gavman i spona long tim bilong ol we Troy i bin go pas long dispela tim.

Troy i bin kisim tim Kimbe i go long provinsal sempionsip i bin kamap long Lae. Em i bin go pas long 23 faita we 16 man faita na 7-pela meri faita.

Troy i tok, "Dispela provinsal sempionsip resis i bin kamap insait long wanpela wik na mi bin pait aninit long hevi weit divisen."

"Namba wan pait bilong mi wantaim hevi weit bilong Madang na mi bin daunim em. Namba tu pait bilong mi wantaim hevi weit bilong Lae na mi bin daunim em tu. Na wankain tasol long las pait bilong mi wantaim hevi weit bilong Simbu."

"Bihain long provinsal sempionsip, kwaliti bilong pait bilong mi bin kam antap long nesanel level," Troy i tok.

Bihain long ol i bin pait long Lae, nesanel sempion resis i bin kamap long Madang. Troy i tok, "Mi bin go pas long ol wankain skwat bilong Tim Wes Nu Briten na go long Madang."

"Mi bin pait wantaim Tim Simbu na birua bilong mi em ol i bin kolim John Rambo, tasol mi bin daunim em na kisim wanpela gol medal," Tomba i tok.

Namba tu nesanel pait bilong em i bin kamap long Goroka na em i bin win long dispela pait bihain long 3-pela raun.

"Long wankain yia, 2005, ol i bin makim mi long go pait gen long Cairns, Australia na dispela em i namba tu taim mi bin go long Australia long pait. Mi bin winim wanpela medal bilong PNG long

dispela taim na pait bilong mi long yia 2005 i bin kam mak olsem," Troy i tok.

Long yia 2006, Tomba i bin go long Simbu long pait long Pasifik belt na em i namba 3 pait bilong em long nesanel sempionsip. Em i bin bai wantaim John Rock Kiwa, husat i namba wan faita na em i bin holim Pasifik belt.

Tupela i bin pait long raun namba wan inap raun namba 5 na Troy i bin givim gem i go long Kiwa bikos tupela i no werim wanpela fut we na lek bilong Troy i bin tekewe.

"Mi bin larim Kiwa long kisim belt bilong em bek bikos mitupela i bin pait aninit long bikpela san na lek bilong mi bin tekewe na hat long pait inap long mak bilong pait," Troy i tok.

"Pasifik belt i stap wantaim Kiwa yet.

"Long wankain yia, 2006, mi bin go long Australia gen long pait. Dispela em i namba 3 taim mi bin go long Australia long Brisbane na mi bin lus."

Namba 4 taim we Troy i bin go long Australia long pait em long yia, 2007. "Dispela em i wanpela strongpela pait na mi bin pait long 3-pela hap we namba wan pait i bin kamap long Melbourne na mi bin lus. Mi bin winim namba tu pait i bin kamap long Sydney na mi lus long las pait i bin kamap long Brisbane."

"Mi bin winim 3-pela pait, tupela lus na wanpela dro long intenesanel level," Troy i tok.

Long yia 2010, Troy i bin lusim Kik boksen. "Mi lusim kik boksen na ol narapela masel arts inap 4-pela yia bikos mi bin painim hat taim olsem no gat haus, no gat kaikai, no gat mani na tu planti dai i bin kamap long famili bilong mi," Troy i tok.

Troy i tok moa olsem, insait long PNG em i bin pait long Lae, Madang, Goroka, Simbu na Kimbe, na ol narapela senta em i no go yet bikos dispela spot i no save kamap long ol dispela senta.

"Long ol pait insait long kantri, mi bin lus long 3-pela pait tasol na ol narapela mi bin win," Troy i tok.

Driman bilong em nau i laik kamapim wanpela kik boksen klap bilong em yet bihain long 2017 jenerel ileksen.

"Dispela spot em i gutpela, bikos yu bai no inap long kisim bagarap, no inap smokim drag, i no gat wanpela birua pasin bai kamap wantaim meri, pikinini na ol narapela lain, na stap gut olgeta taim," Troy i tok.

Fising taitel i stat long Manus

PAPUA Niugini Nesanel Gem Fising Taitel i stat long Manus Provins long Januəri 4, 2016.

Dispela em i namba wan taim bilong Manus long go pas na lukautim dispela resis.

Dispela resis i kamap inap long 9-pela de na i gat 70 lain i resis long dispela pilai aninit long man, meri, junia man na junia meri divisen.

Dispela pilai i bin op long Naringel viles long Los Negros Ailan.

Meya bilong taun, Ruth Mandrakamu na memba bilong Manus, Ronnie Knight i stap tu long opening de bilong fising taitel. Ol spona olsem Chauka Car Rentals, Kamalah Timba na Tapos Lodge na Tours i sapotim dispela ivent.



Hunters i redi gen long 2016

SP PNG Hunters stat gen long trening bilong long redi long trail pilai na 2016 Kwinslen Kap. Long Trinde olgeta pilaia husat i stap insait long 25 skwad i mekim save long trening long hotpela san bilong Mosbi.

Lukim ol poto bilong ol pilaia taim ol kilim skin long trening long stap insait long namba wan lain ap taim ol bai go pilai long Townsville long trail pilai bilong bipo long sisen bai stat. SP Hunters bai gat wanpela trail pilaia bilong ol tasol long dispela yia. Ol poto Nicky Bernard

FINA i bung wantaim USADA na USA Swiming

LONG promotim spot na lukautim rait bilong ol etlit, FINA i bin bung asde (Trinde) long Lausanne wantaim CEO bilong US Anti-Doping Ejensi (USADA), Travis T. Tygart, na Dairekta bilong Sains, Dokta Mathew Fedoruk, na mausman bilong Swiming long USA, Jim Wood long toktok long dispela topik.

Ol het tok olsem WADA na FINA rul long anti-doping program, Komunikesen wantaim Nesenel Federesen na Etlit, ol streteji long Etlit Baiolojikel Paspot, na mekim plen long ol bai mekim tes long ol pilaia husat bai

pilai long Rio Olimpik Gems long 2016.

Wantaim ol narapela wankain bung wantaim Nesenel Anti-Doping Ogenaisesen na FINA Nesenel Federesen em mausman bilong FINA i redim ol samting i bin kamap pastaim long kamapim FINA Anti-Doping rul, we WADA i toktok planti long en.

Bung em i wanpela sans taim tu long toktok long USADA i mekim ol wok gut bilong bihain taim long pait egensim doping long ol hap bilong pilai.

Long dispela Olimpik Gems bai kamap, ol namba

wan swima long olgeta swiming kantri bai go insait long bikipela tes wanpela mun pas long gem bai stat long Rio Olimpik.

FINA i lukim olsem planti yia i go inap nau, olgeta disisen bilong FINA em ol i tokaut long FINA websait.


"Mipela i amamas long bung wantaim ol memba bilong Federesen na ol Nesenel Anti-Doping Ogenaisesen long toktok long ol bikipela asua i bin kamap insait long Federesen na stopim ol dispela samting long i no ken kamap moa," Travis T. Tygart i tok.



Bal blo mi!!!

Nau planti ol meri i pilai ragbi na dispela i soim olsem planti ol samting we ol man i save mekim em ol meri i klia pinis. Piksa i soim dispela meri i stap wantaim na joinim fan long taim bilong Wait Ribon De awenes taim long Tokarara, Pot Mosbi long las yia.

Piksa: Philemon Tame



IMPROVED TASTE! Niupela teist wantaim planti mit na oil. Teistim na bai yu laikim moa yet.

DIANA Tuna



Emi tuna
bilong PNG



RD Tuna Canners Ltd

Moa mit na
oil insait



TUNA IN OIL

Hunters i redi nau

OL skwat bilong PNG SP Hunters i bin lainap long Pot Mosbi long Janueri 5, 2016 long mekim laspela redi long go insait long pri-sisen bilong 2016 Intra Supa Kap resis.

Kosa bilong Hunters, Michael Marum, i tokaut long nem bilong ol 25 man skwat wantaim sampela moa pilai ol i bin skruim long mekim wok redi bilong pri-sisen.

Ol dispela pilaia em; Stargroth AMEN, Bland ABAVU, Ishamel BAIKAWA, Anderson BENFORD, Ase BOAS, Watson BOAS, Nixon BORANA, Sailas GAHUNA, Warren GLARE, Edward GOMA, Benjamin HETRA, Philemon KIMISEVE, Adam KORAVE, Tuvu LEPAN, Timothy LOMAI, Enoch MAKI, Justin OLAM, Brandy PETER, Wartovo PUARA, Esau SIUNE, Thompson TETE, Henry WAN, Ate Bina WABO, Adex WERA, Noel ZEMING.

Wanpela moa pilaia ol i bin skruim nem bilong en em William AQUILA na developmen pilaia em Konnie BERNARD, John RAGI na Simon Peter.

Ol nupela pilaia bai pilai long 2016 em Enoch Maki na Anderson Benford. Maki i bin kisim bagarap long skru na nau em i orait taim em i bin go long operesen long Australia na Benford tu i pilim orait nau, bihain long em i bin kisim bagarap long lek bilong em.

Tupela wantaim i stap sambai long stat pilai long dispela sisen.

Marum bai i go stap long Brisbane long wik i kam wantaim Wayne Bennet na Brisbane Broncos long wanpela wik long mekim trening long pilai long pri-sisen na toktok long SP Hunters i yusim ol Fesiliti bilong Broncos .



Tim SP Hunters i harim toktok bilong kosa Michael Marum bihain long trening bilong ol long Trinde. Lukim ol poto bilong ol long trening long pes 27. Poto Nicky Bernard

Lukim spots poto - pes 27 **Lukim Troy Tomba i kamap nambawan faita - p26**



Wet Sison Taim Bilong Malaria. Lukautim yu na famili biling yu!

- * Treated Mosquito Nets **PREVENT** Malaria
- * Visitect **TESTS** for Malaria
- * Arterakine Tablets **TREAT** Malaria

Good Products, Better Prices, ikam long

Johnstons Pharmacies Ltd

P.O.Box 1066, Boroko, Papua New Guinea.
Tel +675 325 3185 Fax +675 325 0190 Email sales@johnstons.com.pg